

瓊山縣志卷之十六

金石

瓊州府科甲續題名碑

篆額高四尺六寸濶二尺五寸上半截勒文二十九行每行三十五

字下題名分三格每格三十六名

賜進士第資政大夫南京禮部尚書王安誨撰文

賜進士第南京戶部主事林震書丹

賜進士第行人司行人許子偉篆額

嘗讀班史志紀漢武元封初元自合浦徐聞入海得大州方千里畧以為郡麟介而衣裳之猶未之名也口年捐之復於新息以及於五季闕歷數百年間曾未聞一士挾一技名者豈元運尚璞雕琢未施瑰奇之氣鍾於

瓊山縣志

卷十六

金石

物而不鍾於人乎宋稱八榜連破天荒亦在南渡偏安之日非羣天下士而角之也入國朝我高皇帝以奇甸日之風教日新人文丕著十有七年甲子命鄉論秀遂有拔萃羊城蜚英鳳闕自是科第繩繩後先相望而擢蘭省登黃閣者間有其人若邱文莊之理學海忠介之氣節非科第中之錚錚者乎所輸者僅僅一籌未見有崛起以巍我中尉名者而已然有志則事必竟成無地而賢才不出西齋祖常闔越行周封川宣卿豈其素所有著哉風雲會而龍虎興顧所遭何如爾服嶺以南古未有以文字相天下者也而子壽起於曲江碧海孕秀多鍾異人瓊臺學士已繼曲江而作矣詎庸知當今之

世寔無以文字魁天下者乎第君子當以名節自礪倘
袞然舉首以奉大對寔爲三策之伸舒而不爲誣水旱
之平津寔爲日五色之李程而不爲辱伶人之摩詰寔
爲排奄宦之子韶而不爲晉道學之孝祥主和議之蔡
齊唯是而後芳名赫赫歷萬年不朽矣出此入彼必有
指其名而訾之者矧左觸右蠻之不足爲重乎按題名
故事昉於慈恩雁塔今則自國學迄郡邑例皆有之瓊
在嘉靖丁亥二千石林侯命郡博李章纂國初以來鄉
會所薦若干人勒名貞珉豎於庠以風多士且徵於筠
溪氏記之詳矣數年後策賢書躋甲第者科不乏人後
之繼美與先之貽範遠邇又相輝映也星峯王先生政

瓊山縣志

卷十六

金石

二

賈勇於南宮而弗一售者來掌瓊教事講道問業之暇
思爲後生小子者勵也於是採拾前人所未及錄者而
續紀之匪徒以好名也顧是名而思所以稱是名將必
有一舉冠儒科名實相副歸然爲昭代碩輔者出焉是
先生屬望意也余邑距郡城僅百里且昔嘗官太史先
生以爲知瓊士莫余若也故屬筆焉瓊士勉旃先生諱
端黻別號星峯西粵之桂林人也萬曆己卯鄉進士法
得備書 大明萬曆十八年歲在庚寅仲夏之吉

瓊州府儒學教授王端黻訓導黃鋌戴應良杜文秀李
森全立石

嘉靖十三年甲午葉成章 本府人 李 裕 文昌人

李景元 崖州人

林世清 儋州人

蔡廷相 本縣人

陳傅堯 本府人

嘉靖十六年丁酉吳日乙 臨高人

成子學 本府人

鄭汝喬 本縣人 張玉 本縣人

唐維 本府人

嘉靖十九年庚子鍾鳴治 文昌人

林養高 本府人 庚戌進士知府

黃宏宇 本縣人 己未進士 參政

嘉靖二十二年癸卯

陳表 文昌人 歐天敘 樂會人

嘉靖二十五年丙午

張子翼 本縣人 華士迥 文昌人

海鵬 本府人 同知

李開 應天榜知縣

嘉靖二十八年己酉

王贊襄 澄邁人 吳壽齡 定安人

海瑞 本府人 南京副都御史

張學顏 本縣人 乙丑進士 知府

嘉靖三十一年壬子

陳懋芳 定安人 陳成憲 本府人

瓊山縣志

卷十六

金石

程大慶 定安人

嘉靖三十四年乙卯

黃宏憲 本府人

陳極 本府人

陳士瑛 本府人

嘉靖三十七年戊午

劉裁正 本縣人

張瓚 本府人 陳一松 本府人

嘉靖四十年辛酉

王宏誨 解元 乙丑進士

陳維翰 本府人

林華 文昌人 戊辰進士 推官

王汝為 本府人

王顯先 會同人

嘉靖四十三年甲子梁雲龍 本府人 癸未進士 都御史

王啟先 定安人

王懋德 文昌人 戊辰進士 參政

陳所有 定安人

陳大有 本府人

王時元 本縣人

隆慶元年丁卯

陳大烈 本縣人

周溥 本府人

石子介 本府人

梁必強 本縣人 甲戌進士 知縣

何日丁 樂會人

李果珍 澄邁人

隆慶四年庚午

王天麟 本府人

黃可久 會同人

萬曆元年癸酉

官廷玉 本縣人

盛尚志 本府人

吳登第 本府人

陳治策 本府人

蔡宗堯 本府人

邢 斌 文昌人

商大寸 本府人

邱 峻 本府人

萬歷四年丙子

吳遜之 澄邁人

林 震 本府人

劉廷臣 本府人

黃喜之 本縣人

萬歷七年己卯

牛大緯 本府人

曾養正 定安人

萬歷十年壬午

莫維則 定安人

林一英 本縣人

吳尚賢 本府人

王家泰 本縣人

許子偉 本府人

林憲夔 本府人

陳應龍 本府人

谷子遷 本府人

萬歷十三年乙酉

林用棟 文昌人

薛思紹 本府人

王懋昭 定安人

李養高 萬州人

莫一魁 定安人

楊 蒔 會同人

萬歷十六年戊子

瓊山縣志 卷十六

黃昇之 本府人

周有暹 本府人

莫汝德 定安人

周尚賓 昌化人

黃 烈 會同人

海 邁 本府人

案自嘉靖十三年甲午至萬歷十六年戊子十九科中式八十六人其稱本府人者為瓊府學弟子員稱本縣人者為瓊山縣學弟子員考嘉靖十六年丁酉科碑有成子學中式而府志選舉表無之二十五年丙午科選舉表有楊登翰中式而碑無之其於存疑云成子學本府人湖廣海陽軍籍通志作海陽人登甲辰進士苑馬寺卿

巡按蔡公散澳黨碑記 佚

侍御蔡公之按吾瓊也理百年之曠轍剔窮陬之積蠹

播萬靈之新社貪黷解綬氓庶維新真奇蹟哉而最著
洪伐鑄貞珉而不泐則莫散澳黨若也瓊之有澳蓋十
餘年所矣始當事者念潢池赤子不欲專騁戈戟以干
天和而若黨在撫綏之後名爲良民而攘民圖利如故
頻揚帆西向載珠合浦捍憲網不休洋裏遺舳艦稍脆
輒反戈吞噬而四方亡命臧獲遁入其中相倚爲奸有
司壹志包荒示德不欲問且以彼爲強藩且以彼爲勅
禦以故若黨也動聯百艘孛口盡挈而逝則有疑有司
之心有司躊躇顧盼謹愆爲備則有疑若黨之心瓊之
民蜚語搖惑以癩毒且夕潰也則內以疑有司之心而
外以疑若黨之心瓊之勢亦岌岌矣所幸侍御蔡公至

洞奸爛詭講義樹恩一朝而散處之且諭之曰朝廷廓
天覆待若不死若奚以明報也則首者泣而聽俄而曰
廬室邱塚之念人人俱有何若鼠別境觸亡命爲生也
則從者泣而聽不浹旬所云舖前盜藪焦蕩爲隰郊襍
諸闖闖中尚意曰若而李若而陳黠不可近而卒相帖
帖也於是乎瓊無澳澳無黨亡復猜忌而煽惑者矣吁
嗟乎曷以能是哉公之學力追聖軌矚天理甚晰故以
天理感人而人亦以天理應之其相與帖帖而亡復猜
疑煽惑之態則天理之效也偉奉役旋里間從薦紳父
老頌公不朽勝事僉謀碑焉偉乃載筆言曰吾人活零
壤間恃此天理而盜乃滅之然實未嘗滅也彼若人粹

以天理應公如重雲之快睹白日何忍復盜有司樂天
理之在若人而漸摩有地何忍復跡其盜瓊之人方與
捐故輟縮良盟何忍薄之於天理之外而復詆其盜自
此深箐嘯聚之輩願投弧矢勤耒鍤以沃壤益常課而
瓊無內憂自此洪波狂逞之徒亦且斬楫淪櫓潛就樂
土蘄固天年而瓊無外警則皆公餘澤矣公之有功德
於瓊夫豈不閎且迤哉公名夢說字君弼號梅巖起家
名進士爲閩漳巨姓諸善政在粵蓋弗克縷敘云

萬曆十六年冬月之吉

賜進士出身吏科給事中行行人邑人許子偉撰
文

瓊山縣志

卷十六

金石

六

明昌塔石刻

第一級正面南橫石鐫明昌塔三大字左記云萬曆三
十八年歲在庚戌季冬吉日右列瓊州府知府翁汝遇
同知李夢麟通判朱大經推官危純中鼎建共三十九
字正北面一石年月與正南同正西面一石左記萬曆
二十五年歲在丁酉孟冬吉日右列瓊州府知府李多
見同知經仁木通判何自謙推官吳洪績鼎建共三十
九字正東面一石僅存萬曆四丙申肇基七字其四字
之上下皆漶滅不可辨識右邊依稀有文奎二字
第七級鐵柱第一行爲吏科右給事中臣許子偉拜手
十二字第二行爲太祖高皇帝稱南溟奇甸十字末一

行龍飛萬曆二十七年己亥辛未月甲辰日鑄十七字
案塔爲郡伯涂文奎邑人許子偉糾其鄉士大夫共建
據石刻年月建於萬曆二十四年自涂郡伯去任後李
郡伯多見繼其事故其名刻石又歷吳郡伯尚友倪郡
伯凍至翁郡伯始落成故石刻終於翁郡伯此建塔之
始末也志乘於李翁許各傳不載建塔之事後之載筆
重修者當據石刻以補之

重建鼓樓碑記

篆額高六尺二寸濶二尺五寸十七行行
四十字

賜同進士出身中憲大夫廣東按察司副使臨汝胡桂
芳撰文

瓊州舊有鼓樓與鐘樓並峙城東南隅成化癸巳憲副

瓊山縣志

卷十六

金石

七

涂公創置銅壺滴漏其上以校時焉萬曆辛卯年雷震
鼓樓堪輿家遂謂鼓樓在道西不利言於當事者毀之
於是瓊士弗第於春官者再乙未夏門人潘子之揖謁
予言其故予曰復之何如潘子又以不利本道爲言予
曰賢才進地方利矣本道必與奚其疑亟議復之時署
郡者爲蕭二守乃經始焉先是毀鼓樓暨之劉公祠後
規制未失至是改建棟楹榱桷之類多可用者其基趾
則巋然在也費不甚鉅二守查取城工餘銀佐之故不
動帑金而用足無何太守涂公至以此舉有裨地方躬
加督率晝夜匪懈不浹歲而樓成焉蓋丙申秋七月日
也太守又取銅壺滴漏命良工修之置樓上自是瓊士

之上春官者靡不奮發爲天下雄如得海山之助而瓊民往來樓下者亦靡不讓首曰巍巍乎洞洞乎瓊海之巨鎮也夫予因進郡大夫而言曰君子作事所因者三因天因地因人是樓之復也厝神器授民時報鼓傳鐘漏刻不爽因乎天矣跨鰲足舒鵬翼聚秀鍾靈英俊蔚起因乎地矣至謂有利有不利者則未明乎因人之說也天地與人相參焉一裁成輔相在我而已故爲官者恪守其職則必稱爲士者專精其藝則必進此人之可以勝天章章者也予輩將與文士交勉之鼓樓云乎哉乃載筆爲記述是樓成毀之由以告後之君子俾無惑堪輿家謬譚兼以識歲月云 萬曆丁酉仲秋吉日

瓊山縣志

卷十六

金石

八

瓊州府知府涂文奎同知經仁本遜判何自謙推官吳洪績同立

水會所平黎善後碑記 存

珠崖海外一寰區也裨海旁羅郡縣而五指黎黎諸山荆枳其中醞釀黎岐世爲瓊患自漢兩伏波將軍啟土以來歷代叛服靡常無能拓封疆之咫尺者朝廷三勤王師每大舉衆無慮十萬雲集境上斬蓬蒿而夷之始未嘗不發蒙振槁而後稍稍蘖芽尋斧柯也豈非以善後術疎而經遠之畧當日未暇亟講乎頃歲黠酋黎馬矢倡亂糾合諸亡命黎廣王蓋老孫恩第等入內地肆行寇掠州邑震動數年莫可誰何歲己亥督府戴公燿

始下車憫其狀亟拯羣議疏請鵬剿得旨報可乃攷山川掄將帥選徒御時糧糗劬戈矛刻期興師始命東山遊擊將軍鄧鐘率所部精兵偕雷陽副總兵黎國耀瓊崖參將莊渭陽各率所部廣雷瓊土官兵八千有奇分道協剿監軍則雷州府同知萬煜紀功則瓊州府同知經仁木而分守海南道參政林如楚兼督之議者謂盛夏酷炎進師不利宜少須以待秋初鄧將軍持不可夫智貴猝力貴突賊恃險煽亂乘其無備一鼓可克今秋禾將熟逡巡不進賊得獲而守一人據險千人莫過師老矣何克之爲督府善其議趣令進兵維時破門爲賊關隧最爲天險鄧將軍獨當之黎將軍兵嚮定泉莊將

軍兵嚮水焦約閏四月初八日會戰賊料定泉水焦層巒絕巘勁弩踰伏我軍不敢入破門當孔道率其驍牛坡星等守之先是四月鄧將軍移兵馳鼓嶺爲水焦合擊狀倏初七夜撒而趨襲破門諸士有難色將軍登定功峯觀天象適見水星蓋於金星晶光燭天大喜云此破黎之兆也諸士皆奮躍賈勇先登銜枚而前賊兵殊死戰兩岸矢下如雨軍士用皮牌擁衛各以三銃火箭亂射殺其驍牛坡星諸賊驚哭曰官兵自天而下即追奔嶺背大破之賊首王樂天引小隄賊徒七人號七虎圖爲策應立斬之軍聲大振次日莊將軍兵由水焦進又次日黎將軍兵由沙灣進後先夾擊直搗屠祿崗焚

其聚落鄧將軍誠兵固壘因糧於敵窮搜五指乾脚賊首黎馬矢等數十計窮就縛賊衆潰散怖死者躡僵者澤跳者伏菁林而立枯者不可勝計棄弓矢納村落者咸待以不死甫四閱月黎悉定計俘斬一千八百有奇拓地三百餘里督府下令班師瓊父老子弟鼓舞懽若更生爭操牛酒遮道爲將軍賀旋核功次以聞上嘉乃丕績特晉督府兵部尚書守道參政林如楚加秩憲使將軍鄧鐘擢副總兵瓊崖文武長佐而下各紀錄給賞有差遂議築水會城置守禦千戶所謂萬千年不拔之基已海南道副使程有守至區畫經營屹然金湯之固已憲使林如楚副總兵鄧鐘撫黎通判吳俸相繼踵至

瓊山縣志

卷十六

金石

十

規畫先後不遺餘力乃留戍守與屯田勾軍伍稽畝籍創公廨伐山開道東通萬西通儋漸次疏通又設巡司以備譏察立墟市以通貿易建鄉約以興教化暨社學以訓黎庶時屈王正諸耇鬻扶老攜幼於新城觀燈玩彩熙熙然快覩昇平氣象而後督府聞之喜可知也頃鄧將軍時巡水會諸黎父老攜壺漿勞苦道旁拜手加額謂微將軍吾儕何以有今日將軍避席稱謝破門之役重邀主上寵靈遵督府碩畫一鼓而俘罪人諸凡善後事宜種種稟受成命何敢自多父老曰喜督府暨將軍大造於瓊吾儕宜謀世祀率衆創生祠於新城之西以志不忘而屬碑文於宗伯氏不佞辱在宇下聞見最

核念事端初發未嘗不與衆同憂及茲側聽驩聲又不
能與衆同樂雖文辭萎弱竊以爲桑梓之幸無以加此
顧茲役之預有勞者不能盡載謂宜著在碑陰並垂不
朽若督府戴公耀副總兵鄧君鐘則終始其事勞苦而
功高衆論攸歸又不容不表而出之也遂系之以詩曰
皇矣聖明威加六合慕義嚮風莫不震疊蠢茲黎岐滇
甸中窟蟲我腹心世爲蠱賊弄兵四出煽亂一方叛服
靡定虐焰方張帝曰來耀保釐南服哀此瓊人歲羅蔓
毒誓清大憝受命徂征謀而淵默斷乃雷聲桓桓將軍
允文允武仰瞻乾象潛移師旅用奇奪險宵襲制勝銜
枚破關裂竹響應曾是螳臂而當車轍載扼其吭載窮

瓊山縣志

卷十六

金石

七

其穴橫屍血流山海之缺狐妖憑邱鹿鋌走陰天厭盜
虐師不踰旬執訊獲醜其捷如神王路載清黔黎相慶
遐荒旣平四國是定雪夜破蔡五月渡瀘視此鴻功千
載同符掄開當宁褒賞酬庸天掀地揭宴歌彤弓帝眷
南顧還我將軍經營善後保我黎民猷濟滌滌崇墉言
言百千萬禩炳烺長存定國勳勞昭哉祀典飲食必祝
垂休琬琰將軍讓功曰維督府督府不居歸之天子天
子萬年垂衣舞平勒此豐碑昭示百蠻萬曆二十八年
賜進士第資政大夫南京禮部尚書前太子賓客兩京
吏禮兩部左右侍郎兼翰林院侍讀學士定邑王宏誨
撰文

案府志防黎萬曆二十七年瓊山居林等島復叛定安黎酋馬矢倡亂儋崖臨諸黎應之勢甚熾郡守李多見與攝理兵備道余夢鯉集議調諸路兵由臨高定安瓊山三路進攻長驅而進指揮趙孟麟窮追馬矢至乾腳岐界擒賊黨斬獲無算黎島悉平後副使程有守建議設水會所於馬矢故巢穴委趙孟麟牛政築城置參將府云云則與碑記不盡合記云督府戴公耀疏請鵬剿乃命鄧鐘黎國耀莊渭陽三將軍進兵平之其時監軍則雷州府同知萬煜紀功則瓊州府同知經仁水而海南道林如楚兼督之無一語及郡守李多見兵備余夢鯉等即平定後議築水會城亦由憲使林如楚副總兵

瓊山縣志

卷十六

金石

十一

鄧鐘撫黎通判吳俸未聞委趙孟麟等築城惟後副使程有守區畫經營則彼此相同記又云茲役之預有勞者不能盡載著在碑陰似李多見諸人必有勒名惜碑字泯滅無由考證其紀當日平黎之事當以碑記爲是又案水會所在縣西南三百里其地當在今瓊山大小水洞之間城久傾廢故址猶存

漢兩伏波祠記

篆額高三尺六寸闊二尺三寸十六行行四十字

嘗讀蘇長公居儋錄有伏波廟記其詞曰漢兩伏波皆有功德於嶺南前伏波邳離路侯博德後伏波新息馬侯援也南越自三代不能有秦雖遠置吏旋復爲夷邳離始伐滅其國開九郡然至東漢二女子側貳叛海南

振動非新息侯苦戰則九郡左衽至今矣由此論之兩
伏波廟食於嶺南均也余□□□□以山東遊擊叨征
黎之役已仰止兩伏波舊遊地矣壬寅冬待罪於茲求
所稱伏波廟而謁拜之其遺址俱無存者心甚憫之乙
巳之夏地震異常公署屋宇賓館及中軍材官廳事蕩
然傾圮□□□□脩葺爲之一新其時明堂僅容旋馬
復捐三十金購民居開擴之建揖客廳爲求友也夫君
子居是邦必友其士之仁及友天下之士未足又尚論
古之人則孰若漢兩伏波將軍也者夫路伏波以□□
□□守從霍去病討匈奴絕大漠封祁離侯元鼎間討
平南越立儋耳珠崖郡功何偉也馬伏波以□□□□

□南平交阯嘉言善行載在史冊者不可勝紀而窮當
益堅老當益壯數語尤爲吾輩指南則□□□□百
代殊絕人物豈直天下士哉卽遠在千里外猶且願爲
執鞭矧居其過化存神之地惡可不□□□□惡可不
尸而祝之也昔蘇長公爲膠西守立蓋公堂於黃堂之
北時從賓客僚吏遊息其間以爲常取法焉惟是事屬
草創廟貌迫窄恐不足以棲止兩伏波之神顧兩伏波
之神何往不屆卽甘棠憩舍不爲大峴山片石不爲小
若夫充拓而潤飾之端有望於後之人耳是爲記

萬曆三十四年歲次丙午孟夏月吉日

欽差分守廣東瓊崖陸路等處地方兼管白沙水寨海

防副總兵溫陵鄧鐘撰 左所千戶□□□立
案原碑深入地三寸其字有不可見者攷鄧遊府以萬
歷二十七年己亥督師戴耀因黎酋馬矢倡亂命東山
遊擊將軍鄧鑑率所部精兵偕雷陽副總兵黎國耀瓊
崖參將莊渭陽各率所部進剿則余下缺四字是嘉靖
己亥蕩然傾圮下缺四字是爰卽鳩工路伏波以下缺
四字攷前漢書路博德傳云以右北平太守從票騎將
軍封邳離侯是爲右北平太四字馬伏波以下缺五字
攷後漢書馬援傳云交趾女子徵側及女弟徵貳反攻
沒其郡九真日南合浦蠻夷皆應之寇畧嶺外六十餘
城側自立爲王於是璽書拜援伏波將軍是爲璽書拜

瓊山縣志

卷十六

金石

古

將軍五字吾輩指南則下缺五字是其時雖遙隔惡可
不下缺四字是廟以祀之惟左所千戶缺姓名徧考職
官表明千戶無分注年代難以指實闕疑可也
湖廣巡撫贈兵部侍郎梁公諭祭碑

萬曆三十四年 月 日

皇帝遣行人司行人白竹諭祭巡撫湖廣等處地方提
督軍務兼理糧餉都察院右副都御史贈兵部侍郎梁
雲龍曰惟爾偉畧宏深淵謀遠筮官武庫簡贊戎行
東鄙西陲屹崒長城之倚南倭北虜並崇京觀之封掃
穴績著於崧山犄角勞深於苗播乃膺任齊越鎮撫楚
中捍衛賴以無虞調停每聞殫力倏然盡瘁良用悲傷

嗟英氣之長垂仰高風之不泯特頒祭葬庶慰重泉
仙人峒石刻

案峒在蒼屹山後峒口一石如爐內有石版刻云盤龍
屈曲自何起伏回翔幾里後人於何里字下添方長三
字今字蹟猶可辨識

清惠亭石刻

清惠亭三大字萬曆戊申年瓊州府知府倪凍題石柱
刻聯云心如水德如風到處陽春原有脚渴者飲勞者
息因民樂利本無心又云過海天增濶看雲路不迷漲
海棹歌發重城花氣來相傳爲倪郡伯筆跡

倪公井銘

瓊山縣志

卷十六

金石

圭

雲無噴玉洞天流瓊味兼四美德配八功誰爲此者東
越倪公爰鑿渾池載開鴻濛

案石柱八角頭似劍鐔例插於地每面刻銘一句字大
二寸許井在清惠亭東邊銘柱在井旁

瑞雲橋碑銘

存

維橋之南山房水渦建自趙宋長橋卧坡地震傾圮年
所歷多歐陽郡侯步禱經過諭募修築鞭石填河告竣
不日輿徒式歌昭哉明德千載不磨

案碑分二截上半刻銘分七行行八字下半刻同修姓
名惟知府歐陽燦通判佴夢驪數字尚存攷歐陽燦萬
歷年任刻碑當在其時

府堂禁約 正字額高五尺濶二尺四寸七行行十五字字大二寸

瓊州府知府翁訪得海船行劫皆船戶通賊同謀分贓如班船戶毛壬林陸俊良等已拏正法外合行禁約今後商船被劫即拿船戶依強賊得財律問罪船沒官信地官不行擒獲通提究革裁支月糧的無虛示
萬曆三十九年四月立石

案翁郡伯汝遇萬曆三十七年來瓊興利釐弊施藥賑貧訓課士子安集流亡種種善政詳在本傳其嚴於禁奸治盜則概未之及有此禁約已足窺見一斑碑在海口天后廟西階

干埔嶺刻石

瓊山縣志

卷十六

金石

十六

長河懸龍樹竒石插雲天若問磨崖者莊生戰代年

瓊崖參將平黎將軍莊渭陽題

案嶺在水會所西南三十里有大石直峙大六尺高丈許形如大碑俗呼碑記石明平黎將軍莊渭陽題詩刻石是萬曆二十七年黎時所刻字形猶可辨識

初設撫黎通判吳翁俸遺愛碑

案碑在水會所大書十二字旁無小字年考俸浙江會稽人府通判以督捕兼撫黎萬曆二十九年添設撫黎通判以俸題補俸乘馬矢平定之後開示信義招撫黎人聽招者數十崗輸誠數百村建水會所社學以教之黎人自此知學後補瓊山知縣碑立於去任時縣志有

傳

瓊郡伯歐陽餘山公祖遺愛祠碑記

嘗稽史冊爲循吏者往往以去思見稱毋亦有仁心惠政起敝維風足快於一時者與其顯庸殊勞除患溥利永賴於後世者與其化成澤久水漬兩濡民之不能忘者與故召伯巡行憩留棠舍寇公去郡父老子弟擠擁車前願借一年者不可數計此皆前史所豔稱而以論今日之瓊則於歐陽郡守見之夫瓊中爲黎嶠外環大海其地延袤復渙散而不屬治之如運痺手足心主而形不隨與圖其敝如瘵疾之不受砭其弱似可使而難附其輕似可動而不良故上下之間幾賓旅焉求其能

瓊山縣志

卷十六

金石

十七

愛戴而尊親之自松陵張公晉江史公仙遊李公而外寥寥未有也惟公朗中而霽外宏謩而密理廉而不剝明而載清躬行儉德以先之勸諭鄉約以導之憫郡志湮滅而品彙悉自心裁則春秋彰善之旨也軫歲祲民枵而平糶以示賑卹則飢溺由已之懷也黎少聞喜事率多張皇公一撫鎮之以誠山海宴如則千古禦夷之上策也諸如批答而六察風清步禱而經旬雨洽爲儲養人才則學宮之圯焉者修之爲慎守海疆則城垣之塌焉者築之纖至鄉曲一夫之事竈婦里兒胥稽自爭者靡不以廣視兼聽口諷意諭手成爰書倏而庭空如風散雪凡質厥成靡不滿意而誠服之由縉紳以至衿

佩之良觴鞅之後博士弟子畸人寒酸靡不曰公實愛我而公方直道而行若春霆隆然非有呢呢悅人之響而幽夢發嘉條榮亦未嘗私焉至於今日舉渙散難屬之情靡不收拾俾之踴躍歌舞皆知其上之可尊可親動乎腎腸微乎眉睫豈非默然有感孚足快一時而民心不能忘者哉易不云乎咸感也恒久也恒主人君其道必久咸主人心其感必速公以其久者恢復政治以其速者鼓動人心蓋久大共貫而咸恒並彰也昔宋廣平施德於廣及入爲相廣人頌焉韓昌黎在潮時潮人交稱皆爲立碑垂後情不容已而言之匪諛者今公守瓊治行不讓二公適遼事倥偬國家軍資多出自醴政

瓊山縣志

卷十六

金石

六

聖天子廉知公治狀高等俞銓請二東醴政悉以畀公公將行矣郡縣庠袁生炳星王生天龍凌生鼇馮生一麟許生宗瓚鄭生之良歐生忠泰親炙公深相率釀金建祠於兩庠之右謀共伐石以志不忘因徵言於予而予昔令公鄉今爲公子民知公之治績者有年故樂從諸生之請辭雖不文後之觀是祠也其曰此瓊郡士民攀轅之思而歐陽公之宦績亦與張公史公李公輝映後先也已公諱璨號餘山豫章新建人是爲記

賜進士第奉訓大夫南京刑部江西清吏司郎中通家治生邢祚昌撰 同知李鳴陽推官黃守正知州林廷蘭余化淳李春榮知縣柯重光沈萬言唐天與李一令

汪金聲林大佳楊鳳翔阮萬欽吳植瓊崖參將楊茂都
萬曆四十七年歲次己未夏月吉日

案記中松陵張公名子宏晉江史公名朝宜仙遊李公
名多見府縣有傳惟歐陽餘山無傳府縣志不載其遺
愛祠豈當時遺忘之歟抑明社將終祠改建爲淨土菴
而遺迹遂湮沒歟未可知也

瓊州府歐陽郡侯遺愛碑銘

維此奇甸教習中州震沈薦警蛇豕虔劉帝咨若采用
錫康侯惠鮮懷保綏靖和柔遐陬極溘安軌順流東山
踵武南國興謳茫茫巨浸業業靈丘我侯遺愛海岳同
悠 舉人吳鉉鍾撰 陳家宦書

瓊山縣志

卷十六

金石

九

萬曆四十八年仲夏月吉日通郡紳民全立

案歐陽郡守宦績留遺猶可考見修瑞雲橋督造蔡梅
巖生祠修伏波廟石刻俱有其名則當日政績遺愛碑
中所言似非虛語此銘碑在靈山祠中想當易代時國
初修府縣志者事屬草創採訪不周原存碑版無人采
及近在郡內之遺愛祠碑亦不一見故不爲立傳

海南道梅巖蔡公之祠記

佚

梅巖蔡公以直指使者飛航按瓊法墨摧暴銷叛均猗
所爲瓊人盡百世之利者難以枚舉北渡之日瓊人扶
攜攀轅至車軹而不得前且勒珉以志遺思云後十九
年以觀察使者督學治兵於瓊豐功渥澤如直指時及

遷秩行瓊人扶攜攀轅亦如直指時又八年同郡戴子
燿承乏是邦瓊人爭擁車前問公安否無不悲喜交橫
者已而聚族立祠得地北郊之遠文武將吏相與捐貲
鳩工庀材郡守歐陽君燦丞李君鳴陽祇董厥事未兩
月而工告竣既堂既寢罔不具飭參戎何若斌臣別駕
俾君夢驪萬守林君廷蘭指揮崔宗應等若而人又爲
買田若干畝充春秋祀費造請於戴子燿日子之鄉幸
而有蔡公蔡公之祠又幸而子之在是邦春秋俎豆能
無辭以志遺思余自維材最駑下慚負後塵然而公芳
規在焉惟畫一守之余焉敢辭於是仰而歎曰嗟夫瓊
人思善哉思而在數年之後也可以觀真矣夫召棠猶

在虞柳勿翦杜石可沉羊碑不磨古今以爲盛事而後
之赫赫材名爭詫爲步召踵虞提羊躡杜而其民亦窺
其意所欲得爭之爲俎豆以附於棠柳碑石之思然居
官則思去則已通顯則思晦則已當日則思數年則已
此何以故哉真思者正氣之所感非可以材名而致從
來赫赫見材者叱霆矚電乳姆溫纘非不可爲國家張
氣而保元然一涉利害遇艱危每至弁股嘶聲削息喪
膽臨道躊躇坐失千里能察機觀變而銷禍於未形否
能從容指麾而救危於將亡否其氣有所不足而緩急
無所恃賴安能繫人心而動之思也惟英偉豪傑之士
有邁往直前之氣招之不來麾之不去投之以大而不

驚臨之以卒而不撓當之以變而不亂能於轉盼咄嗟之間而暨奠枕歸疆之績藹然遠動人心之思此非孟氏所謂至大至剛塞乎天地之間者乎蔡公以孤忠勁節獨立於世耿然如秋霜夏日不可狎玩自爲直指及爲觀察慨然以澄清天下爲己任廉墨之所激揚良暴之所摧持防垢之所瑾剔芬癘之所標瘡其利澤可數千百年而未竭瓊人戴之將數千百年世世子孫奉公而無休已而其最感人而動人思者則莫如散渙黨一事當李陳二酋結夥補前陽聽縣官招撫而陰懷異志動聯百艘稱戈吞噬有司徬徨莫敢問岌岌乎癘毒且夕且潰公至檄二酋至庭示以大義諭以禍福二酋相

對泣下歸傳諸黨數日悉解散去海氛頓清迄今三十餘年瓊人談之無不咨嗟感歎壯夫聞之心傾神越弱夫聞之亦且毛竦骨豎舌橋而久不收也然則瓊人之所以久而思思而祀也豈以材名致者哉公之正氣彌宇宙故能使將吏傾附紳章承風田畷舞潤而德久彌渥功久彌彰思久彌新公之正氣不可撓故一忤總憲再忤政府三忤功司持憲中外者什二怡情泉石者什八然至談天下英偉豪傑必爲公首屈一指總制許公直指王公心好之不啻口出豈非同氣之求而好爵之縻也哉今聖主思用耆舊且倚公爲社稷臣公且以計安瓊海者計安社稷名世勛猷將勵鼎勒之煇敬拭目

以俟瓊人曰趣登石

賜進士第中憲大夫廣東等處提刑按察司分巡海南道奉敕整飭兵備兼提督學校副使閩漳戴燿撰文

瓊州府知府歐陽燦同知李鳴陽推官傅作霖通判俾夢驪萬州知州林廷蘭瓊崖參將何斌臣海南衛指揮崔宗廕王蓋全立 萬曆四十三年

案祠在北郊之達當北門官市左右今廢

漢兩伏波將軍祠記

篆額高四尺二寸濶二尺五寸二十五行行四十二字

上御極四十有五載華夷率俾幽明咸熙自昔忠臣名將膺狄勛夏郵災捍患有功德於民莫不秩於祀典罔時怨恫維漢邳離新息路馬兩伏波將軍廟食嶺南而

瓊山縣志

卷十六

金石

三

瓊郡之祠猥在參將公署塞後若北面而朝者戴子燿渡海之三日謁於祠下仰視榱桷而歎曰嗟乎邳離伐夷新息苦戰關三千餘里活百千萬_民不得半畝之宮以居迺寄人門屏爲饗哉於是行營演武塲之西高廠地伐木鳩工爲廟蓋與漢前將軍關侯廟並峙云參戎何君斌臣遂遷兩將軍神位而俎豆之請燿爲記余維於天爲三立而不朽而功與德未嘗歧而二之蓋夫子大齊之功而曰徵管仲吾其被髮左袵矣又曰如其仁如其仁故膺懲則功而捍郵則德至於生爲人英歿爲鬼雄捍郵之靈百世彌光而供奉之虔徧海內外則惟前將軍關侯耳兩伏波將軍蓋以功則管相之族以德

則關侯之亞也此非所謂不依形而立不待生而存不隨死而亡者乎瓊南右三代爲遼絕殊黨之域王教不暨正朔不加至西漢邠離伐滅其國始仰流而受號然迄東漢叛服靡常至目爲荒裔不足誅鋤新息苦戰懷音向內而衣冠禮樂遂斌斌與中原埒蓋是時瓊爲混沌之世而兩侯並著開闢之功大海天塹汪洋浩淼怒濤顛波吐蜃揭蛟望洋向若多至股栗魂喪卜於二侯曰吉而後敢濟真蘇東坡所謂度量權衡必不吾欺者蓋此地人苦風濤之險而兩侯並顯利濟之仁瓊南之民以兩侯爲管仲而南北之濟以兩侯爲關侯關侯之祠徧天下幾與學宮浮屠比而兩侯之祠迺獨焉卑所

以報之者至淺鮮矣安在其罔怨悃神其可不恭而改建其可或緩耶或曰極治之國其神不靈爲政者將汎掃夷孽靖恬海氛斯民不祈而得其所欲不禳而除其所患烏乎有冀於神是不其然夫飲水者知源享利者思報農之報德也以其魚菽豈謂吾儕偷食而忘膺懲捍卹之德而其報願後於農與豺獭卹者黎岐交惡中國之福而好事者非之謂南海之地如甌脫而鮫館綃宮不熄滅者紫茶故表而記之以動瓊人崇德報功之思且識主上華夷率俾幽明咸熙之治云共成其事者並書於左

賜進士第中憲大夫廣東等處提刑按察司分巡海南

道奉敕整飭兵備兼提督學校副使闕漳戴煇頓首記
瓊州府歐陽燦同知李鳴陽推官傅作霖瓊崖參將何
斌臣海衛指揮王盡李開永王燦斗李宗定崔宗慶高
口張國勳口德容全立 萬曆丁巳重陽日
案碑列指揮高下其名難辨德容之姓亦闕考職官表
指揮使有高卓高誥高焯高炯四人卓有傳嘉靖年任
餘三人俱未有注以時攷之必是高焯無疑至德容即
闕姓職官表有張德容即其人也

石泉靈應四字碑

案碑在鹽灶村龍王石廟後明時所建年月湮滅不能
辨識

瓊山縣志

卷十六

金石

三

按瓊喜兩碑記 供

欽差巡按廣東監察御史李雲鴻撰

崇禎十二年

歲次己卯夏月吉日碑在城東北東坡菴

帝念堂記 篆額

賜進士第中憲大夫廣西布政司參議前刑部山東清
吏司郎中治生邢祚昌撰文 崇禎十三年庚辰冬月
立碑在城內準提古寺東階嵌壁上

長哉閣記 篆額

賜進士及第太子太保刑部尚書兼文淵閣大學士順
德黃士俊撰文 崇禎十三年庚辰冬月立碑在西門
內準提古寺

秦二碑俱存其字多不可辨識惟篆額結銜字猶分明
保釐海甸四大字石刻

案石刻嵌府署照壁後橫額旁無年月款識字體勁秀
神似南宮

治瓊五戒

正字額高五尺六寸濶二尺二寸十二行每行三十五字

一黎岐之官與瓊相終始皆緣地方文武官吏巧爲藏
身之計動以激變兩字寃坐波害之家致擄掠公行殺
人無數事主無敢鳴寃如此殘虐誰殺伯仁吾恐鬼神
鑒之宜戒一也

一強賊結黨徧地皆是閒有士紳爲窩難於捕捉卽有
擒獲監錮後來有司輕爲解脫此輩一出肆行報仇殺

瓊山縣志

卷十六

金石

五

人放火致被劫之家無敢告發此等流毒吾恐子孫受
之宜戒二也

一土司差役下鄉甚於虎狼已有屬禁各屬吏承視若
弁髦誰爲司牧令民無告宜戒三也

一駙遞派於里甲原屬厲政乃上司以此優容差役下
司以此奉承過客差外之差苦中之苦尚可忍乎已經
勒石禁革宜戒四也

一瓊屬士風寡廉鮮恥小民畏之如虎以故市井無賴
之徒咸思夤緣倖進以肆其志而州縣有司輒奴隸視
而箠楚隨之良楛不分玉石俱焚同類曾不相關誰司
督學之責乃令士類不清士氣不振若是耶宜戒五也

此五者於瓊最爲關切因勒之以備羣臣其餘橫民橫政難以指屈在居位者知警省耳

崇禎癸未年仲秋月備兵督學使者林汝翁勒石於堂之左側

案今碑在城隍廟西壁下

貴陽府同知梁思泰諭祭碑

崇禎十六年六月

皇帝遣廣東布政司分巡海北海南道許成章諭祭原任貴州貴陽府同知贈按察司檢事梁思泰曰才識疏通願懷忠烈頃緣狡酋狂逞爾能越境赴援嗣以敘口口黔復能捐軀死戰魂依於瘴雨蠻烟之地節炳於巖

瓊山縣志

卷十六

金石

三

霜烈日之中不負裹革孤忠無慙匪躬夙志特加贈秩仍建坊祠祭墓并頒以當欽泣

特贈諡策文碑

崇禎十六年六月奉

天承運皇帝制曰爲國捐軀固臣子堅貞之節加恩進秩乃朝廷激勸之章義烈可嘉旌揚宜急爾原任貴州貴陽府同知贈按察司檢事梁思泰義急冠纓胸嫻韜畧慷慨條議提一旅以登陣烈凜同仇冒九死而迎戰勢孤援寡食盡力窮罵賊殞身抗聲飲血旣遂求仁之志足徵盡瘁之忱式振頽風特頒彝典是用加贈光祿寺卿諡忠烈於戲毅魄可吞妖月壯魂足噬強夷悠悠

人半偷生慄慄爾能嘗死榮敷綸綍色耀旂常

賜進士吏戶兵三科給事中許忠直公墓表高五尺八寸
濶二尺

先大夫以雷憲掌瓊篆余舉孝廉省親官署因以知瓊山之許公文章則宗邱深菴理學則師陳白沙楊復所氣質則效海剛峯及余以閣事厯覽文宗諸科臣奏議敬服於公有素矣嗣是壻翁吉鼎以特用改授瓊州其為門人許生台明萬里走啟請余撰墓表乃得悉公之素行焉許公諱子偉字用一號旬南原籍金陵八年十四早喪父侍母任太孺人守節教養居恒讀書披覽不倦舉萬歷壬科鄉薦登丙戌科進士授行人司行人與海剛峯公並居瓊郡福德里公忠廉介志同道合剛峯

瓊山縣志

卷十六

金石

三

公捐館大行儀會舉同鄉之賢者護喪以公名請公不憚萬里跋涉奉差御塋工竣擢兵科左給事中尋陞吏科左給事中請歸省親起補戶部左給事中廷旨降謫公居家孝友為國忠貞疏劾權貴之要津進議內使之開採代貧窶之昏姻切飢寒之推解存夏常卿之芳名助王衛弁之襲職薦人才不取禮謝杜閑說不大公庭有益於世道人心者公心健言有傷於民情風俗者公必補救所建明昌塔設儋耳義學開敦仁館掌教文昌玉陽書院所著有廣易道警覺語文編吟草等書公之事業未終勲名有待再奉簡命而溘然仙逝矣公生嘉靖乙卯年六月初九日亥時卒萬歷癸丑年五月初二日

亥時享壽五十有九官清如洗產業不滿千金名重如山景仰每欽多士闔郡紳耆呈請祀於鄉得如例春秋祀公共建坊表旌公忠直配孺人曾氏伉儷齊眉初于歸公也事箕帚操井臼供甘旨理家教子至老不倦外而會賓客內而男女昏姻孺人稱中饋之淑貞者矣孺人生嘉靖丙辰年七月二十三日辰時萬曆乙卯年八月二十七日未時有丈夫子三長曰公明娶陳日履女先公卒次日合明娶邱文莊公曾孫女三曰命明娶李芳名女俱有聲庠序克昌厥後有女四一適唐侍郎冢孫處明一適鄭學憲冢孫之良一適陳學博長子德明一適牛衛揮長子瑞斗天啟六年三月初三日藏公與

孺人於臨山合水之原崇禎十七年清明日立墓碑余敢不表之謹銘之曰

諫草修筆不修舌文皇轉圜鑿熱血一生骨鯁堅如鐵何當枉笏呈直節嗟乎高風世雖隔久仰忠貞著廉潔鬱鬱佳城得安厝峩峩陶山隱藏宅生爲名諫沒鄉哲行人過者視貞石

賜進士第東閣大學士太子少保禮部尚書蔣德璟拜撰崇禎十七年歲次甲申春月立

峩德璟字申葆晉江人官至東閣大學士明史有傳起句言先大夫以雷憲掌瓊篆考德璟父光彥萬曆年間任布政司參議官雷瓊又言壻翁吉鼎改授瓊邦考萬

歷三十七年知府翁汝遇吉鼎是其字府志有傳汝遇
爲循吏振興學校訓課士子則忠直公子合明爲翁所
拔取受業門下故代請表墓其事跡一一符合

海氏宗祠銅獅銅豸遺器

案高二尺許重二十餘斤不燬年月爲明代所留遺海
氏子孫世世相傳以爲忠介公時所造至今春秋祀事
敬爲陳設可見世家宗器數百年猶寶用之名賢之遺
澤孔長也

新建漢兩伏波將軍廟記

存

嘗聞有功德於人然後享百世之俎豆前漢邳離路侯
諱博德後漢新息馬侯諱援皆有功瓊州士民歲時崇

瓊山縣志

卷十六

金石

五

祀歷千百年不毀者皆曰非邳離遠伐新息苦戰焉得
收遐荒爲一統變樸野爲文明瓊人思慕奉祀固其宜
也邳離書史不多見新息之平交黎著有圖說收水陸
形勢列如指掌固知其經畧山海非直技擊爲長也而
銅柱兩指千古爲昭功德又不止在一方一世也至讀
訓姪諸格言則其治兵行己以禮可知儒將風流可則
可佩而據鞍示健正其不以安榮忘國事忠貞之性到
底益烈家起扶風派衍天下予童而聞長而仰過扶風
而拜邱墓今任海南訪廟貌奉者極多龍岐爲近隨致
祭焉時有教場居民請建兩伏波公祠至其地則無片
瓦隻椽僅有斷碑則係前賢戴公不忘原祠拱參將衙

宇而移建大路令往來瞻仰之意也若仍建此地離居民遠恐難久存今建本衢便於護守橫書匾額英靈如在且海面風濤賴侯默平利涉至爲福於生民捍災禦患又兩侯之素性然也罄筆難悉聞龍岐有倭寇犯境望其郵落不敢入鄉人以爲有侯祐焉則此方居民焉知侯不又大有威靈顯赫造福無窮哉今地則官址也其鳩工辨材則府廳州縣暨諸紳舉貢矜僉助及贖緩用以創建侯祠司理洪公之傑捐貲二十金督工則巡檢王如德生員某及義民某並力起工訖工月日所費金錢殿宇房屋數目俱列碑陰予以久觀不能親視全工而廟貌規模則微有可觀惟期居民永守崇奉並今

瓊山縣志

卷十六

金石

三

文武諸公時加盼矚保護焉

敕飭海南道兼攝瓊州學政分巡使者都門馬逢臯撰
康熙六年歲在丁未孟秋月吉日

重飭天妃廟田舖碑記存

瓊郡環處濱海海門一區猶郡治要津通南北而便商民者也厥地廟祀天妃歲時崇禮凡諸鼓楫颺帆乘潮而順渡者莫不肅容起敬蓋儼然海天巍柱爲神稱赫赫焉舊制置有舖苗田載在舊碑歲入其稅於廟廟祝存爲香燈蠟醮品之資乃值沿革不無變更毀折無知小民輒生漁獵以致鼠雀興訟茲逢分巡海南道馬憲批清查舊制說明勒石竊思千秋廟祀例不可磨矧屬

定制則國法存焉矣制屬祀典則神聽存焉矣有制闕國法而可妄意漁獵也耶典屬神聽而可妄意漁獵也耶夫亦可撫膺生惕矣爰以原置田舖坵段開數逐一勘出宜存者井井備勒用垂廟祀不朽云

瓊州府推官湖廣洪之傑撰

康熙六年歲在丁未秋月

案府志云康熙四年推官缺裁據馬逢皋伏波廟碑云司理洪公之傑捐資碑六年立則推官非四年裁缺

新建準提閣並重修二蘇祠記

存額篆碑高八尺濶三尺五寸分十四行每行三十

六字

二公者乃為前賢宋端明學士蘇公之兄弟而創建也

瓊山縣志

卷十六

金石

三

準提閣者乃余今日闡翼蘇公之德業而落成也按郡志金粟泉為蘇公鑿其泉穴湧粟有如金粒亦宇內之一奇也是以筵楹其上令人酌斯泉輒仰止蘇公於勿替叨署理瓊之右戎事公餘之暇嘗偕紳士名流過之載賡歌而行雲遏丘君潛甫莊君言允李君天如洪君省修周君□□咸謂其髫年浴此掬泉為樂今已周一甲子矣夫泉之甘冽可品而嘉之至若泉底之湧粟誰得而探之啜之詎非蘇公之靈異濬發不與卓錫之泉媲美千秋乎一日陟祠瞻禮觀其堂基湫隘欲擴而宏敞之因憶蘇公於榮仕之日尚與佛印機鋒說偈留玉帶於金山及遷謫南來惜無繼佛印而互相闡發其禪

機衍傳法教於海外蘇公未免有餘相焉爰致厥率於
諸同事會各然其請鳩工庀材經之營之益於此薩之
陂建準提一閣莊嚴金相並飭其祠俾蘇公在天之靈
來格於瓊島者不殊游衍於金山燈燈輝映儒釋同流
後先寧有異致焉是爲記

古太丘易知識微甫頓首拜撰

康熙七年歲次戊申仲春月穀旦

案易知河南人鎮標右營游擊職官表不載其某年任
據碑立於七年是七年前任八年爲徐登雲任

重修漢兩伏波將軍祠記

存篆額高六尺濶二尺二寸分
十行

治民事神國之大典也我朝廷設官分職令天下郡縣

瓊山縣志

卷十六

金石

三

有重民社崇學校祀境內先賢名宦捍大災禦大患有
功於地方者歲時致享焉以云報也況於萬里之遙大
海以南使數千里疆土盡入王會如伏波將軍者乎余
先大人總督兩廣時曾繪圖入京上呈御覽未嘗不歎
其銅柱奇勳歲辛酉余來守珠崖考郡志瓊州舊名瑋
瑋此古交阯分地也乃訪將軍故祠瞻拜之時知有兩
伏波焉前伏波西漢邳離路侯以北平裨將出塞有功
元鼎間討平南越至東漢復叛反不常乃遣新息馬侯
西擊先零南平交阯前後皆稱伏波者得毋以瓊孤懸
大海萬里民俗尊稱由漢而來已然乎千百餘歲而萬
里荒島至今奉正朔不改者則兩侯之功真與五指並

永矣獨可嘆者海疆夙號殘瘠兼以連遭兵燹未及修明祀典而不識尊崇入其祠頽垣敗戶瓦礫蒿萊余不禁愀然三嘆曰以二侯伐山航海之功而廟宇如此傾圮是誰之責耶爰倡捐資鳩工修之規模重煥二廡更新是舉也蓋仰遵治民事神之大典厯代名臣之有功於地方者以時享祀且並望後之官茲土者知瓊之兩侯有開疆拓土之大功而踵事增華使今之視昔猶昔之視今繼續脩明用垂不朽

中憲大夫知瓊州府事加二級關東佟湘年撰

廣東分巡雷瓊道按察司副使程憲篆額 瓊州府海

防清軍糧捕撫黎同知王元臣書丹 瓊山縣知縣茹

瓊山縣志

卷十六

金石

三

鉉全立 康熙二十二年歲次癸亥十月望日

重建蘇公祠記

佚

昔人云山川之奇能開人之性情而供其筆墨文人之奇能發山川之靈秀而留其名勝杜之夔州李之夜郎韓之潮陽秦之三巴坡公之海外皆遠厯山川而其文益奇也山之蘭亭園之金谷亭之放鶴堂之屏山洲之鸚鵡石之雪浪泉之浮粟皆文人選勝而其名始著也余好遊塵跡幾徧每遇先賢故里或騷人題咏或山川奇爽未嘗不感慨係之殺青而記於郵筒甲寅余選授瓊令瓊古珠崖地也讀賈捐之請棄一疏私念如屬國鳥孫不愜人意及讀坡公外集與玉蟾軼事又未嘗不

私念瑤宮瑤圃名可聞而不可至今邑以瓊名豈果荒
域流沙一無可登眺者受事後卽詢步坡公遺跡低徊
久之惟一泉如釜上有樓三楹兩屋勿蔽矣房一菴頭
陀如槁木禿石與語不解里民曉正音曰學士安置儋
州耳此特其行遊地也時余卽題一絕句爲僧人作乞
食因緣後適以他事至儋耳訪坡公別業所謂載酒堂
與桄榔園悉荆榛勿翦乃作鷓鴣天一調寄慨歷丙寅
文武各上官致祭文莊忠介二公余得與焉適邱公祠
東位端明蘇公道臺程公曰何以邱公祠而並祭蘇公
也明經邱維昌曰以向經題請得配祀故爾程公曰正
配宜遵典禮歷代來自四配後凡理學明儒經濟名臣

瓊山縣志

卷十六

金石

三

得配食者必於正祭有專祠茲旣云配宜於蘇公主祭
而邱公配之未聞以邱公家廟而位置端明也余聞浮
粟一泉向經蘇公命名且時爲行遊者應於此地另建
專祠庶不失禮特土木費繁粹難經營耳郡刺史佟公
欣然應命曰崇祀先賢表彰名勝此守令職也恐縣官
因公苦父老守願徬任之乃聯騎偕往共相區畫佟公
卽相土度工易樓以堂者慮海國風雨飄搖也覆泉以
亭者泉以公重也增置書舍廊房者爲仕宦從祀地也
泉之外鑿池而植以芙蓉者以儋誌蘇公載酒堂前素
植蓮而以此享公也至若一泉爾或呼金粟或呼一粟
或呼一勺或呼浮粟殊無定名余於暇日相彼流泉見

源穴浮沙漾細石如白黍公之名浮粟也殆義取諸此
歟抑或視浮生其若寄渺太倉於一粟寄意於言外耶
余因程公正祀典之非而並定泉名恐後人之訛以傳
訛也是舉也不獨表先賢之勝蹟而實昭崇祀之知禮
且俾端明得慰其舊遊而文莊亦安於九泉落成之日
佟公親行致祭會文武各屬設宴斯堂程公曰坡公文
章於海外益奇浮粟一泉得坡公益著今郡守毅然獨
舉則余與爾亦藉以不愧先賢矣總鎮吳公謂余曰如
此曠典不可不記以垂不朽余唯唯曰昔坡公之渡海
而南也年六十有三矣當其困頓珠崖以春夢婆爲知
已雖厪念故鄉而不可得又安知千秋百世後有如斯

瓊山縣志

卷十六

金石

五

之人以地傳地以人重高山仰止而修明祀典哉余年
亦六十有三矣視坡公直如太華爾敢擲管以傳勝事
聊紀實以望將來 瓊山縣知縣山陰茹鉉撰

案志云茹鉉十三年任考記言甲寅余選授瓊令甲寅
爲康熙十三年又云歷丙寅文武各官致祭文莊忠介
二公余得與焉丙寅爲康熙二十五年則建祠在二十
六年無疑志又云朱批二十二年任瓊山知縣舉拱垣
二十五年任瓊山知縣則茹鉉二十二年已去任何爲
二十五年尚在瓊得與致祭據記文爲當日實事疑志
有誤

新建約所義學碑記 供

月吉讀法古治也負耒橫經古學也自五品六行之教衰而門第重鄉舉里選之法廢而士習壞由是樸者不循夫親遜而黠者日趨於淫邪世家素封各分門戶以矜聲氣單寒孤族雖資性可造者力不能執經問業焉此風俗人文之所以不古也歲壬戌余恭膺簡命巡視瓊疆瓊古荒服也不獨聲明文物不類中州卽要而城郭繕焉勿固重而學宮圯焉勿煥余不禁慨然久之乃命郡邑長吏先修舉其要者重者以固封疆以崇文典因思臣子服官各有專職風俗者守令之責也學校者禮所屬也余職察吏爾寧庸越俎然治之盛衰先徵民俗吏之賢能首在教化今聖天子心切民瘼欽頒上諭

瓊山縣志

卷十六

金石

三

尊聖崇賢表彰實學願乃講讀無地教育無術其何以一道同風仰副宸衷哉是不得不表率各屬亟與郡守謀經始幸郡守素有同志因共思捐俸落成之郡守又請於余曰海外科名晨星落落學者之過歟抑教者之不得其術耶今欲於約所之後再建學舍延文望者造就單寒且兼請命名以垂永久余曰此曠古盛舉而更深慰余願者也第考之前代自郡邑兩庠外別無學之可名惟經奏請者始得置書院然非紫陽白鹿西山建陽陽明諸大儒不敢教授生徒也舍此而外惟新安朱子增設社學刺史洪泐有古小學之議大司農倪公鴻寶有社學講堂之條然皆令博士弟子員各相勸勉已

爾若地方有司而延師置館洵振古盛事也余聞耿壽
昌有義倉之奏勸富民歲輸粟以備賑范文正公有義
田之舉歲以所收給耕讀今郡守不惜金錢倡立學館
且歲給米薪修資以鼓勵單寒此真一時義舉也卽名
之爲義學亦何不可然余尚有說焉義學之建固爲寒
士生色乃一郡人文未得借觀其何以振興文教余意
更欲每月於朔望講約外就斯堂定期會課白余暨守
令以下終而復始各捐金授餐且甲乙之以表優等則
一舉而尊朝廷法制賢愚不肖旣讀法而凜王章更居
稽以敦實學士習民風行見化行俗美紹休於文莊忠
介二公時矣郡守欣然應命曰此誠瓊郡之千載一時

瓊山縣志

卷十六

金石

三

爰卜日鳩工是役也肇於丙寅夏孟竣於夏仲計大門
三間講廳三間中堂房三間後書舍五間左右書舍三
間廚房一間前後明堂蔬圃方廣如焉卜構於城南之
直街俾四方便於聽聞也約所之建余與郡守共捐之
義學之立延師而教授之郡守之力居多余不沒人之
善也郡守爲誰佟湘年也始終其役而月旦課藝者舊
瓊山令茹鉉也瓊州總鎮左都督吳公謂余曰如此盛
舉洵千載一時予雖武臣方至豈公等獨爲君子乎閩
白嶼山襄陽非異人任值茲鼓勵人才敢不勉力共襄
盛舉爰是水師副總兵李左營尹右營周皆歲值一月
而各營衛都守及學博咸與焉余不禁喜而不寐曰天

下有如是一舉而文武同心數善咸備者乎此誠千載
一時不可不記之記之者非邀名也慮珠崖大荒文教
式微且歲有颶風修葺維艱既難經始復難善後是不
得不望後賢之宦歷瓊疆者而增美廣大之以垂於永
久則余願始慰爾故記之

分巡雷瓊兵備道程憲撰

察程憲正紅旗人由廕生康熙二十一年任據重修丘
海二公祠記云歷丙寅仲夏而郡內之城郭泮宮約亭
義學次第告成丙寅爲二十五年是碑記立於此年

重建邱海二公祠碑記

佚

古仕宦者多矣古名臣亦不一然或望重省郡而不能

瓊山縣志

卷十六

金石

五

徧及朝野榮於生時而不能傳諸沒世雖其間亦有遭
逢之不偶乎要亦生平學業居官治畧未必真可傳世
而起人服教畏神之思爾若邱海二公則不然二公者
皆瓊人也思文莊公自翰苑歷東閣三十餘載史稱其
正笏立朝有曲江風度晚進行義補一書雖推廣於西
山然萬世治平之道莫踰此矣忠介公由邑令至開府
大法小廉聲望等於孝肅迄今誦御史受杖一言其風
蕙抑凜凜即是二公者余敬之慕之匪伊朝夕矣歲辛
酉余出守瓊州雖慮珠崖荒域甚於長沙然私幸備官
二公故里猶得仰高山而讀治譜抵任後卽延訪後裔
購遺書恨世遠年湮多闕畧勿全乃取二公文集命瓊

山茹令校輯而補梓之至若邱公後嗣雖有蔭階與明
經弟子員亦未免概同王謝海公後人僅一孝廉而物
故一綫不絕者僅如叔敖耳兩賢祠宇靡蕪於荒煙蔓
草余每從享祀之曰未嘗不登堂而愀然以傷也雖欲
修舉適興作未遑歷丙寅夏仲而郡內之城郭洋宮約
亭義學始次第告成爰請命於我上臺程公公曰經術
如邱公經濟如海公此天地間生而與日月爭光者也
余仰之久矣崇尚先賢我等分內事也卽晤臆巽吳公
同瞻拜兩祠共捐貲修繕迺邱公一祠雖塵封月滿猶
堪整葺若海公一祠則傾風圯兩不可復間因訪忠介
公故居卽鄰邱祠惜也子孫式微轉鬻他姓余如價贖

之爰卜日而兩役並興其間應新應仍應補應築應翦
伐應粉飾應平治庶幾曲盡告竣日如禮隨道鎮文武
而與祭焉因各擇兩公後嗣專守之道鎮二公曰是舉
也匪獨遂景仰之私實快復海公之業余曰敬慕有年
不意於萬里外親拜音容則此舉寧敢邀先賢之勿吐
亦只告無罪於維城二公雖生不同時乃異世比鄰倘
得起九京以下朝夕談心亦一快事且更使千秋百世
後世敬公之經術或敬公之經濟其裨我後人之立朝
居官者不淺豈曰服教畏神修舉一時而已哉蓋亦後
賢之所當世世典型者爰記之以永將來

中憲大夫瓊州府知府關東佟湘年撰

康熙二十六年歲在丁卯口月

張江二公祠記

篆額高五尺濶二尺二寸分二十行每行四十字

張公諱瑜字口口口口人爲虎門副將康熙口口口年海寇楊二謝昌等橫行海上侵犯東口口石龍等處公是時爲水師遊擊奏調往勦遂率師征新會口口地方力戰平盜三十餘所而海盜謝昌李積等游弋江門侵犯沿海一帶鄉村劫掠商民與土匪潛通聲氣勢甚披猖公奉檄統水師諸弁往勦水陸並進奮勇長驅殲賊無數俘獲三十餘賊所有爲賊被掠者救出男婦二千餘口厥功其偉賊由是出虎頭門揚帆遠去分擾高廉出泗州抵瓊州海口侵逼城下勢甚危急公以二月

瓊山縣志

卷十六

金石

碑

領兵來援會海口水師夾攻大敗賊於白沙門俘獲甚衆追餘黨至安南洋界而返還師泗州釋賊所俘男女二千餘口雷瓊二郡商民皆銘公功卒以積勞歿於軍江公諱起龍歙縣人爲海安副將正值海賊侵犯雷瓊之時率師力戰敗賊於分水洋面賊自此無敢犯其境後因提兵巡洋遇颶風舟覆雷瓊二郡商民間耗咸相率泣祭海濱兩岸皆滿由是顯靈海上舟楫往來每遇風波不測祈禱立應康熙二十年余奉簡命來守瓊州渡海之日時有大風舟子告以虔祈二公可保無虞果如所言蒞任後順商民所請建祠於海口大街鳩工庀材不日落成具二公事蹟詳請上憲轉咨於部聖天子

錄功議卹旌表貞忠詔下之日商民感天恩報二公之
功適祠宇告竣輪奐奕奕足妥神靈敬請爲文以表忠
勤勒諸貞珉以垂不朽余謹書其事並繫歌詞以樂神
庥其祠曰桓桓將軍如貔如虎指揮蒼兕保寧疆土時
有巨寇聚嘯海浦出沒洪濤飛揚跋扈劫掠商民敢犯
曲部誰爲勦除勢難招撫將軍誓師赫然斯怒駛我樓
船張我旗鼓乘風破浪擊沈無數追至安南掃清醜虜
力瘁滄溟神遊水府威播重洋靈昭海宇鯤壑安流鯨
波順軌有功則祀捍災禦侮春秋匪懈前歌後舞降福
孔皆爲瓊篤祐

康熙二十六年歲次丁卯秋月吉日瓊州府知府佟湘

瓊山縣志

卷十六

金石

三

年撰並書

新建蘇文忠公祠碑

碑高八尺濶二尺六寸分十七行每
行四十字

余曩年時讀公文章見其渾涵光芒雄視百代切切奉
之然猶以爲文焉已耳旣而考其立朝大節則忠君愛
國不隨時俯仰雖屢遭摧抑投之荒裔弗悔不禁慨然
興曰偉哉文忠行如其文真足爲吾師表者乎歲癸未
余奉命巡撫廣東偕部閣大人來瓊審理黎情謁公祠
陋其制謂雷瓊道真副使曰先賢遊歷之地山川生色
草木增華矧公謫居茲土與姜唐佐黎子雲輩講學明
道爲人士倡其有造於瓊甚大俎豆而尸祝之宜矣何
至弗緬弗鞏若是廓而新之其何敢後副使曰諾爰及

賈太守協力捐俸拓地庀材鳩工姚郡丞贊理維勤正
有堂中有廳外有碑門與邱海二公祠鼎建爲三而統
以周垣經始於本年三春十閱月告成請紀其役以諭
後人余曰然遂記之

巡撫廣東等處地方提督軍務兼理糧餉都察院右僉
都御史彭鵬頓首拜撰 提督廣東通省學政加一級
翁嵩年書丹 廣東分巡雷瓊道按察使司副使加隨
帶二級紀錄六次黃國材篆額 廣東瓊州府知府賈
棠 瓊州府海防兼撫黎同知姚哲 儋州知州韓佑
瓊山知縣木章 文昌知縣吳文美 澄邁知縣高魁
標 會同知縣曹允中 臨高知縣樊庶 昌化知縣

瓊山縣志

卷十六

金石

三

何子澄 監修瓊山縣丞蔣永裕

康熙四十二年歲次癸未嘉平月上浣吉日

特建邱文莊公祠碑

公先明一代文臣之宗也相孝宗紹烈祖致太平博洽
古今著述甚富皆有裨於世教而衍義補一書自謹幾
微至成功化本末內外罔不畢該可以接聖賢之傳可
以贊帝王之治實與西山真氏同爲大學功臣乃僅準
鄉先生社祭之義從坡公共祀景賢豈非闕典余竊有
慨於斯久矣龍集辛巳按事至瓊謁其祠竦然曰崇先
賢所以勵後學也况公之文章事業尤足興起百世者
乎不專何崇不崇何稱庸已諸因命雷瓊道黃副使等

移之爽塏而更其規制三祠並建壯麗若一至癸未季冬告成既宇既庭祀事有經以彰哲軌以翼休風以砥頽俗皆於是乎在爰勒貞珉紀其由云

康熙四十二年歲次癸未嘉平月上浣吉日

巡撫廣東等處地方提督軍務兼理糧餉都察院右僉都御史彭鵬頓首拜撰 提督廣東通省學政加一級翁嵩年書丹 廣東分巡雷瓊道按察使司副使加隨帶二級紀錄六次黃國材篆額 廣東瓊州府知府賈棠 瓊州府海防兼撫黎同知姚哲 儋州知州韓佑瓊山知縣木章 文昌知縣吳文美 澄邁知縣高魁 會同知縣曹允中 臨高知縣樊庶 昌化知縣

瓊山縣志

卷十六

金石

三

何子澄 監修瓊山縣丞蔣永裕

特建海忠介公祠碑

品行之高由於學問公之忠貞耿介公之學問爲之也世乃以爲血性之剛不知公矣今觀備忘集文章經濟皆足千古而治安一疏尤言言至情言言至理非有大學問而能然乎故夫以末秩而折權要非妄也以小臣而觸天威非狂也以盛位而甘清苦非矯也於理見得真於心存得正於氣養得充蓋自藏修之年卽著嚴師教戒而凜凜於虧影辱先則其學問固超然遠矣余不敏學問不逮遠甚然區區之心時欲以公爲法吾師乎吾師乎豈有歷其里登其堂見其廟模挾隘而不亟爲

更新也者願是役也剏之者余成之者黃副使國材而董修不辭勞者賈太守棠姚郡丞哲是皆有志師公且欲瓊之士庶皆知取法乎公者嘻人盡師公天下何事不可爲哉天下何事不能爲哉庸書於石以俟

康熙四十二年歲次癸未嘉平月上浣吉日

巡撫廣東等處地方提督軍務兼理糧餉都察院右僉都御史彭鵬頓首拜撰 提督廣東通省學政加一級

翁嵩年書丹 廣東分巡雷瓊道按察使司副使加隨

帶二級紀錄六次黃國材篆額 廣東瓊州府知府賈

棠 瓊州府海防兼撫黎同知姚哲 儋州知州韓佑

瓊山知縣木章 文昌知縣吳文美 澄邁知縣高魁

瓊山縣志

卷十六

金石

器

標 會同知縣曹允中 臨高知縣樊庶 昌化知縣

何子澄 監修瓊山縣丞蔣永裕

易山小說 佚

署之東偏偶然堂之前向有石山高丈餘周數十武頑然不靈時時院內草樹叢雜刺眼逼面絕無曠遠之致日夕坐對間如積陰不陽鬱鬱當我懷抱去之惟恐其遲也予於癸未歲四月由韶移瓊會海警未靖日孜孜於調度甲申夏勦撫既定及冬又有沿邊巡勘之役皆躊躇而未遑今春仲始召工匠而平之曷以短垣護以迴廊蒔竹數竿蕉數本冷綠映人生趣勃勃砌下種秀石數卷落落不羈時有雲氣一縷摩盪其上空青南來

紫翠東至仰觀俯察境換目遷其得乎曠遠之致乎先是有人告曰是山爲形家所忌亟去之便又有或來告曰是山初始經營幾費工力一旦平之似不經予笑而答之獨不觀予之堂額乎天下事無在而非偶然耳前此成之偶然也必有謂也予不得而知也今此平之亦偶然也非所謂也予固可得而言也予之性在曠不卑卑於戶牖在遠不局局於跬步在天成不沾沾於人力山川之樂得之自然者真得之雕琢者假人之性得之超豁者澹而可久得之窒隘者其風期必不俊邁予蓋有所取爾工力云乎哉形家云乎哉或唯唯而退旣而竊嘆曰予謬膺一鎮且在海外一以安靜以享聖天

子太平無事之福退食之暇手一編以佐政治所未逮倦則尋此君高致想見王徽之咏嘯文與可墨瀋又或含睇蕉石如對懷素揮灑南宮袍笏亦足以收海濶天空之概予性其爾爾耶若夫後之視今猶今之視昔是我非我或山或池俱非予之所得而問也爰敘數語伐石而記之

鎮守廣東瓊州等處地方左御史世襲一等精奇哈番襄平范時捷撰

雙泉合祀祠記

余以壬午歲由漢陽守奉天子簡命兵備瓊南至海口登舟見夫水天一色波濤不興乘風揚帆逾時而渡雙

事甫浹旬訪郡邑名勝得雙泉祠於城東門外蓋郡人
建以祀二蘇先生暨前明太守武林翁公者也夫二蘇
文章氣節當時重之後世傳之矧坡公久謫儋耳穎濱
亦安置合州宜乎瓊之人士興慕而尸祝之矣至瓊僻
處遐荒唐宋以來皆爲遷客流寓之所居迨設立郡邑
涖茲土者代不一官官不一人政事才名豈乏表見而
獨配之以翁公也其故何哉稽厥志傳乃知翁公之植
德於瓊人者至深且厚而瓊人之致感於翁公者尤真
而摯一切載之郡乘勒之貞珉茲不具詳第雙泉之名
則因蘇公鑿之於前翁公濬之於後瓊之人士聞蘇公
之風佩翁公之德乃合穎濱而三之也職是故耳嗟乎

瓊山縣志

卷十六

金石

巽

自宋及明取科第歷卿相赫濯顯榮纍纍若若曾日月
之幾何灰飛煙滅寂寞無聞者何可勝道二蘇官不稱
才翁公位終郡守且世之相去也數百餘歲地之相去
也數千餘里而遐方之外島夷之氓慕義頌德歷久彌
新且欲借一勺之泉以虔蒸嘗於弗替豈非人之所重
者在於名節而不徒恃乎區區祿位也哉抑余又聞之
貪泉之傳也以吳隱之廉泉之名也以范相年釀泉之
著也以歐陽永叔此雙泉也蘇公翁公亦偶然疏之濬
之遂使後先繼美傳爲韻事而至以名其祠是三先生
不以雙泉重而雙泉則藉此以不朽矣越一年癸未翁
公文孫嵩年以名進士督學來粵公明之譽洋溢江海

而余謬膺薦牘特旨陞見復蒙聖恩授粵之觀察案牘
勞如夙夜黽勉期以景型前哲故兩人道義相規頗稱
莫逆尤熟悉其世德郡之人以祠宇漸傾庀材而新之
董其成者太守賈棠臨高合樊庶而余曾有事茲土也
哉故爲之記

分巡雷瓊兵備順天黃國材撰

康熙四十二年歲次癸未口月吉日

重修靈山祠記

碑在靈山祠

六祝六祈之制詳於周禮古稱粢盛豐潔嘉栗旨酒馨
香於神明以祈三時不害而民和年豐者皆所以爲民
也故凡郡邑祠宇能捍災禦患有裨民社者禮應隆其

瓊山縣志

卷十六

金石

七

廟貌肅其壇壝用敬民敬而迓神庥亦膺民社之寄者
所不可忽也瓊郡有靈山祠舊祀六神自宋迄今靈爽
赫濯明洪武初守臣入告詔登祀典出來尚矣瓊之民
以旱療疾疫禱者踵接祠下而神之昭應抑若於瓊民
利病痼瘼欣戚不隔者蓋神之靈誠足以捍菑禦患佑
我蒸民乎其如祠宇歲久頽敗已甚余分巡至瓊抵謁
之日目覩榱棟傾欹丹堊脫裂方欲鳩工加葺會攝臬
司篆旋叨卓薦復提刑全粵鞅掌不遑此心切切未嘗
以身遠遂弛夙志乙酉春觀察焦公濫瓊圖葺之念倍
切於余總鎮范公雅有同心爰謀之郡守賈君與諸牧
令協力贊襄經始於是歲仲秋落成於季冬傾者以立

欵者以樹朽株蠹蝕悉爲更置堂宇維新門垣重構於以邀福於神奠我黎庶將見瓊之士民焚香執葦踵接祠下者咸慶年豐而荷神庥歟因郡守賈君之請爰書數言以識

分巡雷瓊兵備道黃國材撰

康熙四十四年歲次乙酉冬月吉

重修三公祠記

瓊郡爲南溟絕島處禹貢荒服外自漢始內屬雖曰禮樂班班然而因仍舊陋文行之士代不多見宋紹聖中眉山大蘇稟負天涵海之才持挺直不回之節言事不當旨以別駕安置簪耳至則儻舍不容買地築居其摧

瓊山縣志

卷十六

金石

哭

窘誠有不堪者而先生固自若惟以詩酒爲事寄忠愛於江泉田畝間時得子雲昆季暨姜唐佐輩日從遊而子雲兄弟尤執禮特謹嗚呼此豈非先生之文之行有以感之而然哉自是郡下人文崛起先後相望其尤傑則有若明邱公濬理學名臣著作甚富有裨世用如大學衍義補諸編久矣傳誦最後則海公瑞嚴正不阿剛直敢言事薄海內外里巷中婦人孺子無不知剛峯者猗歟何聲之烈歟論者謂由蘇公有以倡之於前二公斯有以奮之於後然向使不有二公以奮之卽倡之者亦覺過化之無憑也官此土者以故胥尸俎之第舊非合祀一所又遷變靡定康熙歲辛巳撫軍彭公按黎情

至郡見諸祠率多圯壞分雷瓊分臬使者三韓黃公國材重新之黃公下之郡郡太守厯城賈公棠與余謀謂蘇邱海三公後先一揆曷並祠祀之遂相與籌經費審方位得城外西北隅海公祠舊址又拓其隙地自分臬以迄守丞牧令各捐俸金尅日飭材僦工以瓊山丞蔣永裕尉鄭健偕倉大使方爾諫董其役經始於癸未之春王訖工於甲申之嘉平三祠面北平列設木主分中左右祠各門外繚以垣而鞏其關扁歲致丁祭一時邦人咸樂觀厥成嗚呼士生斯世其卓然不朽者獨文與行耳東坡之念存君國文莊之闡明經義忠介之亮節清風是三公者雖生不同世產不同地遇合不同遭而

瓊山縣志

卷十六

金石

巽

方同道合不得以流寓鄉賢分之固一而三三而一者也並列而祀以誌夫瓊郡文行所自昉與後此繩繩繼繼之燧使海外人士率爾逖聽咸知士習所重舍此文行而外別無自立之端日益奮發又何多讓焉是爲記瓊州府海防撫黎同知黃陂姚哲撰

分巡雷瓊兵備道黃國材 瓊州府知府賈棠

康熙四十四年歲次乙酉春月之吉

四酉臺石刻

四酉者識臺之所由成也余於乙酉卜築年月日時皆酉臺居坎位亦得相助 厯亭賈棠

重建景賢祠記

瓊郡北郭舊有景賢一祠祀宋蘇文忠公軾明邱文莊公濬春秋致祭歲久傾圮康熙癸未中丞彭公命建二公專祠景賢遂廢丙戌歲余續修郡志見崖州向有景賢一祠祀唐太尉李公德裕宋宰相趙公鼎宋學士胡公銓續後改爲五賢祠夫任公伯雨李公光李公綱其賢同其被斥逐同以安置昌化萬安軍獨不得與用是愀然此崖州一祠乃就崖論賢耳余維同是人也當時或以不賢見棄或以賢著名彼亦不自知爲賢不賢迄今尚論古人莫不以賢稱之則其人生平爲何如耶諸公忠義文章昭垂天壤時遇雖有異同節概有如一轍瓊處遐荒絕島得此數賢後先輝映其過化存神之

瓊山縣志

卷十六

金石

三

妙足以風勵有位儀型邦國抑何幸歟余旣不忍舊祠遽廢泯沒創置初心又不忍先賢志同道合祠祀獨有遺缺爰捐薄俸復建祠宇於舊祀蘇邱二公外增列諸賢用彰直道再賡短章勒諸貞珉以期不朽孔子曰見賢思齊焉詩云高山仰止景行行止余深有望於是則是倣者矣因書數言以誌

瓊州府知府加三級賈棠撰

康熙四十五年歲次丙戌冬月吉日

十賢祠碑記

存碑高六尺二寸濶二尺八寸分二十四行每行六十字

十賢者由九賢而增之也而所謂九賢者亦不自九賢始案志明代時初祀郝伯王公諱伯貞徐公諱鑑憲副

游公諱璉名曰三賢繼祀太守張公諱子弘於內始賢而四之嗣又附祀太守史公諱朝宜則又賢而五也其後如副使胡公諱訓兵備兼學使魏公諱成忠知府李公多見蔣公一鳴次第入祀此九賢祠之名所由來也之九賢者或留心於政教或加意於學校或功在黎海士民思而祀之皆爲報勸之典誠嚴矣予嘗過兩伏波祠見有輪煥者焉傾圮者焉緬想前徽瞻仰慨歎是孰使之然哉會太守賈公修郡志凡祠宇有關於政經者悉捐俸修葺以示崇德報功之義合郡士民僉以原任總鎮王公入俎豆其祠曰乃公恩威並燦文武和衆時值旱荒焦勞祈禱復請通糶全活窮民因思舊祠宇列

有九賢僉謀新之神銜同稱十賢爰呈請於副憲焦公太守賈公暨瓊山王令君子咸許之噫瓊士民之是舉也其猶存三代之直道歟憶癸未春予由南韶奉命移瓊舟沿端江值王公櫬歸予瓣香而弔之迨予過陽春歷高雷道路之人吁嗟太息嘖嘖稱公賢遵海而南人予境頌公賢者尤藉藉且述辛巳壬子兩歲天旱公與同城文武步禱幾成病米貴隣邦遏糶公與分巡副使今觀察黃公太守賈公協謀通糶之法呈請兩院下檄郡縣民賴得食是公之惓惓於民生休戚宜士民之請饗廟祀而薦馨香皆事人論定思之賢之之所爲也已三月望日太守賈公設公木主進於九賢之次易其額

曰十賢祠屬予記其本末公賢者也以賢繼賢予不敢以不敏辭乃有起而議之者曰賢而十之恐傷濫以武附文恐傷雜噫是又拂乎瓊士民之直道而非所以通論也考祭法以勞定國則祀此兩伏波之祀事也施法於民則祀能禦災捍患則祀此九賢諸君子之祀事也公之德與九賢之心異代而同轍已之祀公與九賢之祀異世而同揆則亦何濫何雜之有哉况溯明至今三百四十餘年祠之祀者僅十人耳總而祀之固我國家之慶亦遐甸之幸也予移瓊三載坐守雍熙之世執筆爲諸賢而記固予之幸亦諸賢之靈也公附祀後安知不有羅拜卜告於主位之前如伏波祠之赫赫也耶詩

曰民之秉彝好是懿德禮曰焜蒿悽愴神之著也此物此志也夫王公諱起龍浙江會稽人由左都督鎮守瓊州康熙四十二年春特旨加贈太子少保光祿大夫鎮守廣東瓊州等處地方左都御史世襲一等精奇尼哈番襲平范時捷拜撰

廣東分巡雷瓊兵備道按察使副使加三級焦映漢
廣東瓊州府知府加三級賈棠 廣東瓊州府海防兼
撫黎同知姚哲 儋州知州韓佑 崖州知州黃桓祚
瓊山縣知縣王贊 臨高縣知縣樊庶 澄邁縣知縣
高魁標 文昌縣知縣吳文美 定安縣知縣張友程
會同縣知縣曹允中 樂會縣知縣繆宗儀 咸恩縣

知縣吳焯

康熙四十五年口月口日立監修官瓊山縣丞蔣永裕
道大使方爾謙 瓊山典史鄭健

新建文昌祠碑記

客有精堪輿之術者謂文峯塔簪於高岡磐石之上峻
崢拔天狀如筆立且位居於丁與學宮隱映主闔郡文
明之象余既董其事落成矣乃復請於其前建文昌祠
以配文昌於祀典無所考按天文斗魁戴匡六星曰文
昌宮夫文昌一星耳乃天下儼然肖像爲縞衣素烏青
童白馬而徧祀於學宮相傳文昌主天下之科名今瓊
之學宮既闕其祠而祠於他所又不得地神未必據我

瓊山縣志

卷十六

金石

五

若地與神宜上據其勢下接以神文光相映文昌與文
峯方將相倚爲靈助文明而興多土未可知也爰鳩工
庀材得地表若干丈廣若干丈正殿建以三楹毋庸毋
渝制不甚高而爽塏虛白崇以基墉飾以黝堊左右翼
以兩廊亦各三楹側供庖御前爲大門門以內築屏爲
障而外砌以石垣又其外左側建茶亭數椽以濟行人
一切土木瓦礫工役之需約費二百餘金捐之薄俸未
動民間一錢一物是役也雖無雕甍文甍以壯觀瞻而
規模畧備稱郡南巨觀焉仍買田若干畝歲收其租以
資胙鬻延衲子本資並其徒口食之費亦久遠計也工
旣竣借邑多士成釋奠禮行其庭其靈若來登其堂其

神如在已乃陟文峯一二級如身立雲表遠望陶公西石諸山若隱若顯近盼明昌雁塔若拱若揖城閣參差於前峭壁嶄躡於側俯瞰長山飛遶小橋亂石搏之嘈呖突怒聲如洪鐘蓋極俛仰物類之奇莫不合形取勢以效伎於神神其長有此土而盡出其精英法力啟多士之聰而兆科名之盛乎用鑱石以紀歲月

瓊山縣知縣新安王贊

康熙四十五年歲在丙戌秋月之吉

重修瓊山學宮碑記

瓊稱珠崖自漢已列職方而學校之設則自有宋始明初因宋元舊址而加飾焉緣瓊多颶風往往走巖石而

瓊山縣志

卷十六

金石

五

墮堅城當之無弗敗者又木多生蠹棟樑蠹而屋宇頽故學宮每旋飭旋圯修建多不勝書然或令長誦於費而艱於材嘗有閱歲年而不飭者矣余於甲申季冬受事瓊邑首謁文廟而殿廡頽敗齋舍榛蕪壁水橋門夷如平楚至於拜瞻無地登降無憑不禁低徊嘆喟而不能去每當春秋有事於先聖之廟顧僚屬師生憬然嘆曰瓊之學者啟於宋而盛於明况號稱海濱鄒魯而學宮蕩然不治不亦重褻宣聖之神靈以貽學者之羞余忝司牧其何以臨吏民而處其上乎用是皇皇然爲籌度經費謀復舊制以詢於薦紳咸謂非五百金不可越明年乃奉有重修之檄於是上有各憲下及學博紳衿

俊秀舉欣然樂助以襄厥成而余則匡諸不逮爰詹吉而經營之肇始於丙戌之春落成於丁亥之秋堂廡規制頓還舊觀而余向之嘆喏不能一刻安之心庶幾稍憚焉然廟貌雖肅而祭器不備亦何以修春秋之常秩而昭祀典乎憶昔先君子嘗適魯觀廟堂禮器一切祭品位次著有纂輯祀典一書因修學之設并付剞劂將自木豆竹籩以及範銅諸器悉倣古式次第爲之藏之學宮俾春秋有事之日而陳列焉以遂先人四十餘年未竟之志實余之心也夫瓊之人士旣具有鄒魯之風矣余又覩鄒魯之禮器奉俎執觶以趨躃登降於先師之殿庭知必有樂觀其盛感發而奮興者余且拭目俟

瓊山縣志

卷十六

金石

五

之是爲記

瓊山縣知縣新安王贊撰

康熙四十六年歲在丁亥冬月吉日

重修瓊山學宮碑

瓊山爲一郡之首聲明文物甲於諸邑有明一代如邱文莊海忠介諸君子文章氣節炳炳烺烺彰於史冊稱極盛矣我朝開國以來以僻處遐陬風氣稍遠極力振興尚屬有待瓊庠在府治之南說者謂地脈自五峯發源蜿蜒而來浮沉數百里而萃聚於此實擅瓊南一郡之秀理信有之奈海風多惡宮牆日就圯毀向尹斯邑者修葺之舉貲費浩繁三十餘年頽敗相因最後北新

安王公以甲申臘月來宰是邑始議所以興復之公諱
贄字獻甫戊午舉人博學能文而尤工於詩蓋大雅君
子也爲政知所後先甫下車慨然以舉廢興墜爲已任
遂集諸生設法捐修罷心廢精不遺餘力經始於丙戌
落成於丁亥聖宮規模煥然一新矣工既竣首辨諸賢
諸儒先後坐次向攬越無倫得公釐正而定次復造祭
器向俎豆淪亡古制莫考公鳩工製造使器有常數實
有常品復都先王法物焉名宦鄉賢二祠舊址在學宮
之外今割置於禮門左右庶有當古人褒德尚賢至意
且學宮兩旁原有學舍數十間餘地數百丈載在縣乘
乃頽廢之後入於兵民者殆盡公一一爲清理將考古

祠敬簾亭次第舉行蓋自廟貌儼翼廊壁輝煌以迄盡
物盡制百廢具舉不啻翬造伊始之艱鉅而非尋常修
葺之可比也嗚呼三代而下牧民者催科而外罔有先
圖間有事於學校亦文其名爲考績之階耳公之太翁
五修先生積學累行留心祀典著有考畧一書公服古
入官一承先志付梓行世不特潔已愛民冰蘖自矢而
敦行學校惟日孜孜約計修學之費不下六百有餘由
上官以紳士雖各有捐貲不滿十之二三則公之罷心
廢精不遺餘力豈顧間哉因之有感於盛衰之故矣地
脉有衰有旺而殿宇內因之而文運因之旺極而衰衰
極則當復旺茲之氣象維新物靈效伎正秀脉六十年

還元之會而公適扶運而幹旋之者也又以每月兩次集多士課勤帖括獎拔奇尤社名棠花取學宮海棠十月放花之意地靈人傑其與邱海二公後先輝映乎我公作人之盛爲不可沒也諸生請書其事於石求予爲誌其概云

瓊山縣學教諭南海關必登撰

康熙四十六年歲在丁亥冬月吉日

創建瓊臺書院碑記

篆額高五尺濶一尺六寸

大海之極南煙波萬頃中涵奇甸而巨靈伸臂五指矗兀如小崑崙其扶輿磅礴之氣與海光相映鍾秀於人英賢輩出蘇子瞻稱衣冠禮樂班班蓋自宋而已然至

瓊山縣志

卷十六

金石

七

於明而極盛北方之學莫能或先若邱瓊山海忠介之文章氣節尤其較著迨其後而少衰矣今聖天子崇學右文御製訓飭士子文勒之學宮諄諄誠勉聖道與王化並驅薄海內外罔不雲蒸霞蔚瓊之科名業已鵲起而振南宮者猶遲遲有待得非學出多門其人殊而教無專師作輟相半乎每念文教之興在士子固宜爭自振拔而羅而致之涵而濡之激勵而裁成之則在留心學校者出大力而興起靡靡也鵝湖白鹿朱陸講學其間一時雍雍濟濟如勉齋仲默世昌之徒皆廣其師說以昌明理學後人不能望其肩背近世如茅鹿門分守天雄設書院以造士四方之士宗之其成就而上者躋巍

科著偉業名公巨卿指不勝屈次亦多所建白以自鳴於時夫非成效之可據者耶余自維陋劣抱愧前賢而勤宣德教扶植士氣之思未嘗一日忘爰於署之西丁字街得地廣若干丈袤若干丈面勢程功謀由獨斷前爲課廳中爲講堂左右翼以長廊俱五楹又其前爲大門大門之外建石坊額曰瓊臺書院誌其地也是役也雖無文甃雕甍輝煌金碧而宏敞完固軒豁生明一切土木瓦礫工役之需約費六百餘金捐之薄俸不假助援復置義田若干畝以供廩餼延名宿爲師聚闔郡生童講貫其中月有課日有程諸生有艱於自給者或省試無力者亦得仰資歲租以繼其不逮而總以瓊山令

瓊山縣志

卷十六

金石

五

經理其事於是乎學無他歧教歸一轍乃進諸生而告之曰毋口耳從事而精誠是輸毋純盜虛聲而敦篤是務毋大見悅而出見亦悅爾朝於斯夕於斯敬業樂羣而激昂奮發將淬礪之餘光鋌立見如雖處囊如礪發刃黼黻休明潤色鴻業無負海山之靈而文章氣節與邱海其人輝映後先余卽不敢邀功而霄夙有深心引盼於是是亦與有榮幸矣用礎石以爲多士規分巡雷瓊兵備道武功焦映漢撰

康熙四十九年秋月立

新建義倉碑記

瓊州爲左粵支郡環海而處三面俱大洋極東南爲占

城爲暹羅西爲交趾渺無內地可通惟北與雷_州時距以八十里海面舟楫往來風浪云阻非若廣韶諸郡疆連壤接可以豐歉相資而通糴四鄰者也海濱之地多斥鹵冲於水壓於山浮沙而土膏不沃民不力穡而望有秋難矣又四方之人雜遝輻輳耕之家一坐而食之者百故雖一歲再熟而合瓊之粟不足食瓊之人而旱潦可知夫瓊所仰給者獨有雷耳假雷與瓊交饑雷尚可仰食於高肇而瓊必至坐困不思所以善其後徒支吾日前爲不終月之計毋怪乎民不聊生也余承乏二郡觀察下車以來鯁鯁以是爲慮戊子己丑瓊告饑余詳請督撫告糴雷郡得穀數十萬石所活無算然每詳

請上下文移動淹時日而民不卽沾實惠者以此故與其補苴於事後毋寧預策於將來爰與太守謀所以積貯而凶荒有備用捐俸數百金置舊公館一所而置倉厩焉倉在縣學明倫堂後東周巷內地勢爽塏旣無卑溼易蠹之患左右空曠又無回祿卒變之憂位置旣得量材瓦料俱新不費興築不役工匠不勞監督不需時日仍厥垣宇而繕葺之堅好完固可容粟數百萬斛乃捐穀若干石爲久遠計饑則借給熟則輸還管理官吏無侵無漁若紳衿士民之有力者願積穀備荒亦得借貯其中而平價以糴聽其自便總期有備無患不事告糴維艱民沾實惠而已抑有說焉瓊民家少蓄積一有

凶荒商販往往闕出以媒利不雨十日價立騰起甚或
藏匿閉糴惶惑貧民而賈獲三倍且州縣穀價恒視府
為低昂府方朝騰縣卽暮湧今賤歛貴散而出入平衡
盈縮有法未荒而備將荒而計既荒而救庶商無所售
其奸而民恃以無恐乎朱子曰救荒之說上則感召天
和以致豐穰儲蓄次之余不德不敢自謂足以邀天眷
而積穀備荒區區愛民至意則固籌之熟矣聊紀以示
來者

分巡雷瓊兵備道焦映漢撰

康熙五十年歲在辛卯秋月立

新建海口公館碑記

佚

瓊山縣志

卷十六

金石

六

海口當南北之衝冠蓋仕宦之往來必於是焉駐節蓋
此地與海安相望而隔以八十里海面巨浪稽天將渡
而往者潮候不能不須之時日其來者舍舟登岸尤急
謀宴息者也先是公館在北門天妃廟西湫隘卑陋不
足以容車馬又風雨摧敗其行裝不無暴露燥濕之虞
用謀更置於南門城內得地袤若干丈廣若干丈取材
於海北伐石於山南昇土於邱需甃於陶付鐵於治鳩
工於肆運徙轉動於市於是前為客廳後為公寢左右
翼以兩廂俱各三楹大門付以側舍為七楹出大門而
左北向為儀門又其左為官廳其後為茶房為庖御舍
諸別室以門面計者八以楹計者三十是役也經始於

戊子春初落成於今秋七月約計工費六百有奇而民不與知自鎮府廳以及十三州縣莫不踴躍從事余實倡其始也其舊館亦變價附用而屬瓊山令王君董其事創造務謀其可久不侈炫爛之觀茲雖去敞壯麗而崇基墉施黝堊而外毋靡毋渝堅好是輸所幸入斯館者不訾雕甍丹楹之不飭而喜規模之畧備試嘗按部而稽車馬有所人役有次行李有處厨饌有具讌會有歡寢處有適一切上下措置井井有律庶幾送往迎來而賓至如歸乎若夫隨時修葺毋滋敗壞是繼者經久而不敝之良也是深望於後之君子也

分巡雷瓊兵備道焦映漢撰

瓊山縣志

卷十六

金石

十一

康熙四十七年歲在戊子秋月吉日立

重建文峯塔碑記

文峯在瓊邑丁村之東南村曷以丁名謂其地處郡城丁方故名曰丁火行也較丙特秀主一郡文明象附近有玉筍奇峯峭拔嶙峋特峙神瀏鬼斲大不類人間刀斧痕隱隱與郡庠照映先是石塔簪之如立筆狀明以前海南科第特盛理學名賢互相炳蔚雖曰人傑亦地靈也歲久塔就圯陵蕩不復科第漸歎寥落是此峯實關一郡人文石塔興廢尤有係焉康熙甲申郡守賈棠欲挽其頽輒試之標巍杆於塔址一柱孤擎直插碧落越明年鄉試郡中獲舉者果得六人國朝以來所未

曾有噫信矣余忝監司深念瓊州文運凋敝力圖振復至是而後乃戰然曰有是哉興廢之關乎盛衰也特重建名塔費工費鉅非一縑數金一手足力可辦奈何爰謀之賈守毅然仔肩共割俸金以倡自郡丞暨諸牧令若紳衿輩亦無不襄捐資文邑雲志高尤踴躍捐二百金助工知縣王贊慨然爲董其成丙戌三月訪落經營屯磚石一時繩引刀削以及壘結運徙奔走之徒殷殷闐闐如市斯闕不日告成郡下羣推首事於余請記始末余因念浮圖七級緇流藉起宗風雁塔十尋學士共題姓氏形勝固自天成而補偏救壞端資人事今必謂一郡人文盡乞靈於一指頑峯似非有志所樂聞然木

瓊山縣志

卷十六

金石

全

杆小試輒效於前將石塔高標自徵於後今工且成矣異時海南文運大啟科名易奕嗣徽勝代卽不問其推原所自與否而余等嘗備官斯土耳而目之不但藉以額喜也哉故爰筆記之

分巡雷瓊兵備道武功焦映漢撰

康熙四十五年歲次丙戌夏月之吉立

卧碑

順治九年二月禮部奉
行欽依刻立曉示生員

朝廷建立學校選取生員免其丁糧厚以廩膳設學院學道官以教之各衙門官以禮相待全要養成賢才以供朝廷之用諸生皆當上報國恩下立人品所有教條開列于後

一生員之家父子賢智者子當受教父母愚魯或有爲非者子已讀書明理當再三懇告使父母不陷於危亡
一生員立志當學爲忠臣清官史書所載忠清事蹟務須互相講究凡利國愛民之事更宜留心
一生員居心忠厚正直讀書方有實用出仕必作良吏心術邪刻讀書必無成就爲官必取禍患行害人之事者往往自殺其身常宜思省

一生員不可干求官長結交勢要希圖進身若果心善德全上天知之必加以福

一生員當愛身忍性凡有司官衙門不可輕入卽有切己之事止許家人代告不許干與他人詞訟他人亦不

許率連生員作證

一爲學當敬先生若講說皆須誠心聽受若有未明從容再問切勿妄行辨難爲師者亦當盡心教訓勿致怠惰

一軍民一切利病不許生員上書陳言如有一言建白以違制論黜革治罪

一生員不許糾黨多人立盟結社把持官府武斷鄉曲所作文字不許妄行刊刻違者聽提調官治罪

瓊山縣教諭曾克操訓導鄧良模敬錄

瓊山縣知縣馬燧勒石

案碑刻無年月考教諭曾克操訓導鄧良模雍正五年

任知縣馬燧八年任碑立於雍正八年無疑

敕封英佑驍騎將軍江公祠記

高五尺濶二尺三寸分二十八行每行六十四字

古聖王之制祀典也法施於民則祀之以死勤事則祀之以勞定國則祀之能禦大災則祀之能捍大患則祀之矧恭逢聖天子御宇河嶽懷柔百靈効順凡江海諸神應請封爵者悉令入告崇德報功之典皇哉威矣士後於雍正四年署瓊州府事至徐聞縣海安所因得瞻拜江公祠江公者前海安水師副將諱起龍者也士俊

詳考公之遺蹟既悉合古聖人祀典而復深符今聖人之寵命此大義攸關聖恩所及爲臣子者恍然動念豈獨爲行人利涉之私乎公係江南歙縣人順治十三年

瓊山縣志

卷十六

金石

六

任白鶴寨水師參將駐劄通明港港係雷州左臂村墟荒落公心憂焉乃捐俸錢置什器集流民一時商賈輻輳聲勢與郡城埒所謂法施於民者公其有焉時海氛未靖公督弁兵剿捕屢立戰功及晉副總兵官值遷流之後兵亟宜部署民亟宜安集公臂畫周詳調劑妥貼所謂以勞定國者公其有焉康熙五年因海口游踪飄突公擐登舟晝夜遊奕颶風陡發公殞於海滾滾洪波未收遺骨所謂以死勤事者公其有焉公之殞後數載精靈恍惚雲駢風駟穹龜長漁洋船巨艦呼籲立應危者以安險者以濟歷今六十餘年久而愈赫所謂能禦大災能捍大患者公其有焉嗚呼公生而爲英死而爲

靈稽之禮樂疏驗之於春秋外傳質之於國家合甲膺封號而歆血食誠不容一日姑缺也已乃從前守土大吏僅以文卷散佚恐格部議未請於朝雖公之神坦然無與而渡海千萬人之公願卹卹乎恫焉士俊所以矢志盟心於昔年而懋誠陳請於今日者也伏荷聖天子洪恩曠典於雍正九年春欽定英佑驍騎將軍之神命下之日無不感慶然則公之生死豈偶然哉昔蘇文忠記韓廟云其生也有自來其逝也有所爲故申呂自嶽降傳說爲列星若公者稟天地之正氣鎮萬里之海疆豈非不依形而立不恃力而行不待生而存不隨死而亡窮塵歷劫浩然而長留者乎昔昌黎以文德顯於潮

瓊山縣志

卷十六

金石

奎

今公以武功顯於雷瓊潮郡之人水旱疾疫必禱於韓而四方之人乘風涉浪有不禱於公歟然則公與昌黎固分峙乎粵之東西都已今值我國家湛恩汪濊覃及海隅皇上鄭重祀典士俊因得以上陳黼座自今以往知公益感天家之寵賜鑒下土之精誠祥飈甘雨海不揚波永誌清晏之庥也士俊於公敕封抵粵之後奉命巡撫湖北不獲再謁公廟因捐俸銀三百兩修葺海安海口祠宇并礮石記其事以奉揚天子休命

大清雍正九年歲次辛亥冬月

賜進士出身翰林院庶吉士廣東等處承宣布政使司布政使王士俊拜撰

中憲大夫知瓊州府事宗思聖 中憲大夫知雷州府
事口思業 奉政大夫同知瓊州府事李達德 監工
勒石瓊山縣知縣馬燧敬

案李達德志作李文德有誤據碑爲是

重修漢兩伏波廟碑記

嘗聞前人之豐功偉烈後人之景仰思齊曠千古而交
深良有以也前漢伏波邳離路侯後漢伏波新息馬侯
一則掃殲蠻彝使炎荒千里盡歸版圖一則盪除側貳
俾滇粵諸邦咸易冠履一則樓船直下於南溟一則銅
柱高標於異域自宋元豐時已有崇封顯忠王之典其
豐功偉烈孰能過之是故五嶺以南無處不焚香尸祝

瓊山縣志

卷十六

金石

李

而於瓊海爲尤最故蘇文忠公遷儋耳放還時鐫碑銘
於廟以揚神德迄今碑雖泯滅而文猶膾炙人口知兩
伏波之英靈歷千古而猶著也今上御極之七年春穆
若軍門王公巡邊至瓊見二侯廟貌傾頽急懷興修之
志適余於是歲冬由五羊左翼奉調斯鎮而王公諄諄
以託之余乃渡海公餘之暇語巡憲王公郡守宗公牧
將佐令宰諸君咸樂從焉共捐清俸以襄厥成不數月
間堂楹煥新寶像莊嚴喜復舊觀矣是役也雖成於瓊
地方文武之手而實出諸軍門王公興復之心也夫桓
桓將軍千古相契於一轍今雖棟宇璀璨而海疆之風
雨靡常廟貌難期於久遠則今日煥然一新者寧保後

日不復傾圯耶惟願後之官是土者皆感兩侯之威烈
咸奮景仰思齊如軍門王公巡憲郡侯將佐丞牧諸君
同心同志繼而修之使文忠懿跡長存二侯之豐功偉
烈赫濯聲靈歷萬古而愈炳是有望於後之人也至於
葺事銜名與興舉落成之日月俱附於碑左

雍正八年歲次庚戌仲冬十一月吉日

鎮守廣東瓊州水陸等處地方總兵官都督僉事加一
級李順撰文

廣東海南道按察使司副使紀錄二次王璠篆額

廣東瓊州府知府宗思聖書 署瓊州水師協副將黃

錫中 左營守備姚旦 中軍左營游擊周宗旦 守

瓊山縣志

卷十六

金石

七

備董威 右營游擊楊如桂 守備武宏振 儋州營

游擊陳其英 守備劉方成 萬州營游擊徐文龍

守備戴天錫 崖州營游擊高松華 守備段文學

儋州知州王師旦 萬州知州應上苑 崖州知州楊

城 瓊山縣知縣楊仙椿 文昌縣知縣張宗栻 定

安縣知縣莫大任 臨高縣知縣遐齡 會同縣知縣馬

燧 樂會縣知縣余弘仁 陵水縣知縣蔡書紳 署

感恩縣知縣蔡書紳 昌化縣知縣趙方謙

題重刻蘇李二公伏波廟碑記

篆額高山仰止四字碑高六尺闊二尺一寸

按蘇公於紹聖年間被謫嶺外通判惠州

案紹聖元年十月三日到

惠州四年夏轉謫瓊州別駕昌化軍安置四月十七日被

命十九日卽惠州起行七月初二日至儋先生至徐聞
海上禱侯祠南渡越四載元符二年夏四月詔徙廉州
六月復自儋起行經澄邁西郭通潮閣有詩云餘生欲
老海南村帝遣巫陽召我魂杳杳天低鶻沒處青山一
髮是中原抵郡適陸太守以城東北隅雙泉乞名公題
爲洞酌作記繫銘並詩遂於六月二十日北渡抵徐聞
登岸往返無虞作記酬貺欲刻石貽後則二侯原廟應
在徐聞之境今桂象高涼各郡縣里社遍有二侯肖容
俎豆豚酒薦馨勿替而徐聞海上之廟貌闕如似陵谷
滄桑湮其舊址今惟瓊郡北郭道左有二侯崇祠闕前
人碑刻三易其處訖無定所今址亦復奕然侯之英爽

瓊山縣志

卷十六

金石

奕

如蘇公之作昌黎廟碑云神在天壤如水在地中無乎
不出神亦無乎不在則蘇公在徐聞爲二侯作碑記者
無不可在瓊地刻之也後三十年李丞相綱渡海北旋
又爲蘇公志碑陰期刻石以續公志迄今碑碣無存志
乘失纂惟以集有載往來行旅鮮有見者然記云在瓊
旋禱行宮卜期後去則瓊地亦有侯祠順懼二公貺意
泯湮鴻章失表因鼎新祠宇捐資代石駢刻兩記於廟
庶庶二公懿跡與侯英靈共昭千古而後人亦有所稽
考焉

鎮守廣東瓊州水陸等處地方總兵官都督僉事加一
級南陽李順謹跋

雍正十一年癸丑季冬月吉日

合刻蘇文忠李忠定二公伏波廟記 正字額

案二公記詳卷一李鎮軍順雍正十一年補刻入石碑
在伏波廟

潘公河三大字碑

案正字大一尺五寸雍正十二年潘思頌開河時立在
東門外河邊岸上

抱珥山三大字碑

案正字大一尺六寸碑高六尺不紀年月約是清初時
立